


MGA HEBREOHANON,

KAPITULO UNO

 Ug aron maghatag og—og diyutay'ng...sa hunahuna ko wala na'y mas maayo pa, para nako, kaysa sa Pulong. “Ang pagtoo nagaabot pinaagi sa pagpatalinghug, ug sa pagpatalinghug sa Pulong sa Dios.”

² Inig ka Miyerkules, ug siguro inig ka Dominggo, usa sa mga buluhaton sa Dominggo, makapahulay og diyutay ang atong pastor, nga angay ra sàb gayud para kaniya, ug nahunahuna ko nga basin mahimo ra natong maghisgot og usa ka Basahon sa Biblia. Ginahimo na man nato kana kaniadto, ug usahay mogahin pa gani og usa ka tuig para niana.

³ Ngani akong mahinumduman usa niadto ka higayon migahin kita og tibuok tuig sa Basahon sa Pinadayag. Apan, oh, kanindot, sa mga butang nga atong natun-an, ug pagkaanindot gyud niadto! Dayon atong gibalikan ug gihisgotan sàb ang Basahon ni Daniel, o ang Basahon sa Genesis, o Exodo, ug gihisgotan kadto, kapitulo sa kapitulo, ug nagakatakdo gayud kadto sa tibuok Biblia. Oh, gusto ko kaayo kana!

⁴ Unya, atong hisgotan ang...Kung ang Ginoo padayon nga magpanalangin ug makapadayon kita, nan maghisgot kita sa pipila ka halawom nga mga butang dinhi, halawom gayud. Ug moadto kita sa usa ka bahin ngadto sa usa pa ka bahin, sa Kasulatan, mahitungod niini.

⁵ Ug buut ko nga itakdo ang Kasulatan sa Kasulatan. Kinahanglan nga ingon niana man gyud. Ingon nga usa kini ka halangdon og maanindot nga hulagway. Ug sa niining Basahon nga atong pagatun-an, hisgotan nato, oh, ang kaluwasan, ug ang Balaanong pagpang-ayo, ug mga milagro, ug mga kalooy. Ug, oh, mahisgotan tà ang tanan dinhi.

⁶ Ug siguro pagmoabot na sa punto nga kinahanglan ko nang moadto sa mga panagtigum...wala ako mahibalo kon kanusa ako makaadto sa panagtigum, pagatawgon para sa usa ka panagtigum, tungod wala man ako'y nakatakda nga unsa man hangtud nga mabati kong gipangunahan ako nga buhaton ang usa ka butang. Ug mahimo nga sa dili pa mobuntag, mahimong mobiyahe ako paingon sa California nga sakay sa eroplano, paingon sa Maine o sa kung asa man, nga Iya akong pagatawgon. Mao kana'y hinungdan nga wala ko nagaplano og dagkung, hataas nga mga pagbiyahe, tungod kay dili ko man mahimo kana. Dili man gud ingon niana ang akong ministerio, ug lahi ra gayud kini.

7 Ug karon miuli ra ako para makapahulay úsa og diyutay. Miniwang ako og baynte ka libra, sa ulahi ko nga panagtigum. Ug anaa man si Igsoong Mercier ug si Igsoong Goad, kaganina, ug miingon, “Igsoong Branham, nakita ko ang imong ginabuhat. Kinasingkasing mo gayud nga ginabuhat kini.”

8 Ingon ko, “Mao lang man kana ang bugtong paagi nga makabuhat ka og husto nga matang sa buluhaton para sa Ginoo, ang ibutang mo sa atubangan ang tanan-tanan nga aduna ka alang kang Cristo; ang tibuok mong kusog, ang tibuok mong kalag, ang tibuok mong kasingkasing, ang tibuok mong hunahuna, ang tanan-tanan nga aduna ka.” Mao nga pag mobuhat ka og unsa mang butang, buhata kana nga husto kay kon dili nan ayaw na lang kana buhata, kita n’yo, pasagdi na lang kana. Kung gusto mong mamahimong Cristohanon, nan ihatag gayud ang tanan-tanan nga aduna ka alang kang Cristo, ang, imong oras, ang imong talento, ang tanan-tanan nga aduna ka.

9 Ngani namatikdan ko kining batan-ong lalaki. Ang imong asawa kana, Igsoong Burns, di ba, ang nagatugtog ug nagaawit dinha, kining batan-on nga magtiayon. Ug—ug dili man kana piyano, dili sàb kana organ, pero usa kana ka matang sa instrumento, nga ilang ginakaskas ug ginakablit, ug pinaagi niana nagabuhat na sila og usa ka butang alang sa Ginoo. Mahimo mo kanang buhaton, ug makaawit sàb, kana’y, pagpangkabig na man og mga kalag. Aduna gyud ka’y buhaton, bisan unsa. Kung makahimo ka—ka sa pagtaghoy, bueno, magtaghoy ka. Basta aduna gyud ka’y buhaton. Magtestimonyo ka o magbuhat og unsa man alang sa Ginharian sa Dios. Unsa man kana nga aduna ka, gamita kana para sa buluhaton sa Dios.

10 Karon, dili kita magpabilin og dugay, tungod kay kabalo ko nga motrabaho pa baya mo. Kinahanglan pa ninyong mobangon og sayo. Ug ako usab nagapangayam og squirrel kada buntag. Sultihan ko lang kamo sa tinuod. Mao kana ang akong ginabuhat. Mao pud kana’y hinungdan nga miuli ako, aron makapahulay og diyutay. Ug busa nagabangon ako, og mga alas kuwatro, ug nagaadto sa kakahoyan ug, dayon, mangayam og diyutay ug pagkahuman matulog na pud. Ug mao nga nagakadugangan na sàb ang akong timbang, tungod makapahulay-hulay na man ko, sulod sa pipila ka adlaw, kung inyong. . . kon itugot sa Ginoo. Ug maayo ra gyud ang tanan.

11 Bueno, karon, ablihan nato ang inyong mga Biblia. Gusto kong dalhon ninyo ang inyong mga Biblia matag gabii, aron inyong. . . kung mahimo n’yo. Kung aduna ma’y walay Biblia, og nga gustong magsunod sa mga pagbasa, aduna man pud kita’y pipila dinhi, hangyoon lang nato ang. . . ang pipila sa mga usher para mao’y mang-apod-apod niini. Aduna ba kaninyo ang may gusto? Bueno, ipataas lang ang inyong kamot.

12 Nahunahuna ko kung si Igsoong. . . Doc, duol ka ngari ug kuhaa kining mga Biblia. Nagatindog man ka sa duol, ug si Igsoong Burns pud. Husto ba, Burns? Nadungog ko siya nga miingon. . . [Nagaingon ang igsoong lalaki, “Conrad.”—Ed.] Unsa? [“Conrad.”] Conrad. Gitawag ko siya. . . Medyo maglisud na gyud kong makadungog, siguro, Igsoong Neville. Asa ba nako nakuha ang ngalan nga Burns? Nakaila ko sa iyang nawong, pero dili ko lang, dili ko lang gyud madumduman ang iyang ngalan.

13 Ug kabalo mo, samtang nagakatigulang ka na, naamgo ko ang usa ka butang, mas malisud na para nako nga magbasa niining Biblia. Ug dili ko gayud gustong hunahunaon nga kinahanglan ko nang magsul-ob og antipara, aron makabasa sa Biblia.

14 Apan, dinhi dili pa lang dugay, abi gyud nako og mabuta na ko. Ug mao nga miadto ako aron makigkita kang Sam. Ug miingon si Sam, “Bill, dili ko man gud mabal-an.” Miingon, “Pero magkuha na lang ko og eskedyul para nimo sa usa ka espesyalista.”

15 Miadto ako sa Louisville. Siguradong kabubut-on gyud kadto sa Ginoo. May usa ka ilado nga espesyalista didto; nalimtan ko lang ang iyang ngalan. Pero nakabasa na kono siya sa akong libro. Ug ingon siya, “Kung mobalik man ka sa Africa, gusto ko unta nga mokuyog sa imoha.” Ingon siya, “Ug kung ikaw. . . Gimahal gyud ka sa mga taga-Africa.” Ug miingon, “Matuo-tuohon baya kaayo sila, ilabina sa kutsilyo, nga pang-opera. Busa,” ingon pa, “Gusto kong igahin ang unom ka bulan sa akong kinabuhi, para sa pagpang-opera og mga katarata ug uban pa, para sa. . . diha sa pagpangmisyon.” Ug ingon pa, “Kung magkauban man gud tà, ug makaangkon ka og kahimuut kanila, ingon niana,” miingon, “dayon kung aduna sila’y katarata ug dunay kinahanglang tambalan sa ilang mga mata,” miingon, “gusto ko gayu’ng buhaton kana, nga walay bayad, sulod sa unom ka bulan.” Ug gani nakalimtan ko na kung unsa ka dugay kang maghulat para makakuha og eskedyul gikan sa iyaha.

16 Ug atua kami niadto sa usa ka gamay’ng lawak ug dunay gamay’ng—gamay’ng pula nga suga nga nagasiga, didto sa maong mangitngit nga lawak. Aba, nabasa baya nako ang mga letra. Ang ingon nga twenty-twenty man diay ko. Nabasa ko gihapon kadto sa bisan asa nga bahin. Ug iya kadtong gibalhin sa fifteen-fifteen, ug nabasa gihapon nako. Ug gibalhin na pud kadto sa ten-ten, ug nabasa man gihapon nako. Mao nga miingon siya, “Bueno, wala man kaayo’y problema sa imong mga mata.”

17 Ug aduna siya’y usa ka gamay’ng teleskopyo. Duna siya’y gibutang nga gamay’ng aparato sa luyo niadto, usa ka gamay’ng aparato, kabalo mo. Kadtong mga karaang teleskopyo, pila man sa inyo ang nakahinumdom niadto? Ngani nagatan-aw tà

kaniadto pinaagi niana, nagatan-aw og mga retrato, nga sama niana. Ug ingon siya, “Mabasa mo ba kana?”

Ingon ko, “Oo, sir.”

Ingon siya, “Basaha kana para sa ako.”

¹⁸ Aduna kadto’y usa, oh, usa ka tibuok parapo, nga mga *ingon-ani* ka taas. Gisugdan kong, basahon kadto; hinay-hinay pud niyang ginapaduol kadto, nga nakaingon *niana*, nagakahinay ug nagakahinay sàb ko. Pag-abot niya nga mga ingon *niini* ka duol, mihunong na ako. Ingon siya, “Usa ka butang lang ang akong masulti, lagpas kuwarenta ka na.”

Ingon ko, “Oo, tinuod kana, dugay na bitaw kong milagpas og kuwarenta.”

¹⁹ Ingon siya, “Giunsa mo man paghimo niana?” Ingon siya, “Ang mata man gud sa tawo, sa natural, pag modangat ka na og kuwarenta anyos, sama ra sa buhok nga nagakaubanon na, ug uban pa, ang kalimutaw sàb nagakanipis.” Miingon, “Bueno, kung mabuhi ka sa igong gidugayon, mabalik ra kana pag-usab.” Ingon pa siya, “Kana ang ikaduhang panan-aw, mao’y tawag nila niana. Pero,” miingon, “ang usa ka tawo, nga mga kuwarenta anyos na, sa tinuod lang sila’y. . .” Miingon, “Walay problema ang ilang mga mata.”

²⁰ Makita man gihapon nako—nako ang usa ka buhok nga anaa sa salog, bisan pa kung halayo ra kana sa ako. Apan kung anaa ra sa duol nako. . . Ug ingon siya, “Karon, kon mobasa ka sa imong Biblia,” miingon, “ginapahilayo mo kana sa imoha.” Ingon pa, “Pero dili magdugay, ang imong bukton mokunhod na man, hangtud nga dili—dili mo na mahimong ituyhod kana para medyo idistansya ang Biblia.”

²¹ Ug busa gihimoan gyud ko niya og usa ka pares sa antipara, ug ang ubos nga bahin niini, mao’y para sa pangbasa. Ingon siya, “Karon, pag anaa ka sa pulpito. . .” Abi niya og usa ako sa niining dungganon nga mga magwawali, kabalo mo. Ug mao nga ingon siya nga ang. . . imong. . . Ang ibabaw nga bahin ordinaryo lang kono nga espeho sama nianang sa bintana, ordinaryo lang nga espeho. Ug ang ubos nga bahin usab gipatin-aw gyud og ayo, aron nga makabasa ako sa duol, kabalo mo, ingon *niini*. Pero dili lang ko ganahan magsul-ob niini; dili gayud.

²² Ug karon, para sa pagtudlo sa Biblia, gidala nako karong gabhiona ang Bag-ong Tugon. Tungod kini’y. . . Dala nako ang usa ka Collins nga Bag-ong Tugon ug dagku man gud ang mga letra niini. Pero, pag gamiton ko ang laing usa, ginagamit ko—ko man gihapon ang karaang mga Biblia, ug—ug nagabasa gihapon sa mga niini. Apan bisan unsa man kini, ako—malipayon man ako nga aduna sa gihapon ako—ako’y mabasa. Ug—ug—ug unsa man ang aduna ako, ihatag ko sa tanang tawo ang tanan nga mahimo ko, alang sa kahimayaan sa Dios, og wagtangon Niya unta ang sinyales sa pagka-edaran. Dili ko man mahimong

hangyoon Siya nga wagtangon ang akong edad. Ako. . . Oo, usa ka butang kana nga kinahanglan natong agian. Siguradong moagi gyud kita niana. Ug kabalo ko nga dili na ako usa ka batan-ong lalaki sama kaniadto, nga nagatindog dinhi sa entablado. Kuwarenta'y-otso anyos na ako. Ug nahunahuna ko, duha ka tuig na lang, mag-singkwenta'y anyos na ako, Igsoong Mike.

²³ My, dili gyud ko halos makatoo! Bag-ohay ko lang. . . Niadtong milabay'ng duha ka tuig lang nako naamgo nga milagpas na diay ko og baynte. Tinuod. Tinuod kana. Ako gayu'y. . . Dili gyud ko makatoo. Ug bisan pa niana ako—ako. . . Malisud para kanako nga toohan kini hangtud nga mitan-aw ako sa salamin, ug dayon ako—nahibal-an ko nga ingon niana na gyud, diay. Pero—pero sa akong pagtan-aw, ingon ka maayo sa gihapon ang mabati ko sama sa gibati ko kaniadto, ug mapasalamaton ako tungod niana, usab. Sa Dios ang tanang pagdayeg.

²⁴ Karon, pagatun-an nato ang Basahon sa Mga Hebreohanon. Kini'y. . . Oh, usa gyud kini sa mga pinaka halawom, pinaka madagayaon nga Basahon sa Biblia. Sultihan ko kamo, usa kini ka Basahon nga mamahimo gayu'ng. . . Kung itugot sa Dios, ug atong masusi kini og ayo, nagatoo ko nga makakaplag kita og mga bulawanong butang hangtud nga makasinggit kita og mga pagdayeg sa Dios sa tanang panahon. Ug karon ako. . .

²⁵ Ang Basahon sa Mga Hebreohanon, kung unsa gayud Kini, Kini'y gitooan nga gisulat ni San Pablo, ang pinakabantugan nga tigpasabot sa Biblia, sa hunahuna ko, nga nagkaaduna ang kalibutan, gawas sa atong Ginoong Jesus Cristo. Ug gibulag ni Pablo ang. . . Bueno, usa si Pablo ka tinuod nga magtutudlo sa Biblia; nga mao, ang Daang Tugon. Mao lang man kana ang bugtong Basahon nga nasulat kaniadto, nga gitawag og Biblia. Ug gipaninguhaan niyang ipakita sa Mga Hebreohanon, pinaagi sa pagbulag sa Daang Tugon ug pagpakita nga ang Daang Tugon mao'y landong o tipo sa Bag-o.

²⁶ Dinha mismo mahimo natong maghisgot og usa ka hilisgotanan ug mahimong magpabilin dinha sulod sa tulo ka bulan mahitungod sa usa ka panghunahuna, mismo. Balikan sa nato, kung mahimo ablihan na nato ang atong mga Biblia karon, siyempre sa Mga Hebreohanon, sa ika-1 nga kapitulo. Pero kung moabli kita sa Pinadayag, sa ika-12 nga kapitulo, nan bug-os ninyong makita usab ang mga landong. Kung. . . kamo nga adunay mga lapis isulat n'yo ang mga Kasulatan. Sa Mga Heb-. . .

²⁷ Sa Pinadayag 11, makita nato nga si Juan, sa isla sa Patmos, nakakita og usa ka babaye nga nagatindog sa kalangitan, ug ang adlaw anaa sa iyang ulo ug ang bulan anaa sa ilalum sa iyang mga tiil. Ug ang babaye nagabati og kasakit, tungod igaanak

na man ang usa ka bata. Naghimugso siya og batang lalaki. Mitindog ang mapula nga dragon, aron lamyon ang bata sa diha nga kini igaanak na. Ug ang—ang bata gilalin paingon sa Langit, ug ang babaye mikalagiw ngadto sa kamingawan kon diin gipakaon siya sulod sa usa ka panahon, sa panahon, ug tunga sa panahon, o katunga sa panahon.

²⁸ Karon, ang babaye nagarepresentar sa iglesia, ug ang Bata nga iyang gihimugso mao si Cristo. Ang bulan nga anaa ilalum sa iyang mga tiil mao ang kasugoan, og ang adlaw nga anaa sa iyang ulo mao ang grasya. Ang dose ka bitoon sa iyang purong-purong mao ang dose ka apostoles. Ug dinha, sa . . . Ang dose ka apostoles mao ang himaya o ang pagpurong-purong sa Bag-ong Tugon. Kita n'yo? “Kay walay laing patukoranan nga ikabutang kondili ang nahamutang na.” Kita n'yo? Kini, ang Patukoranan, ang—ang Bag-ong Tugon, ang mga apostoles, ang Doktrina sa mga apostoles, ug uban pa, mao ang purong-purong nga patukoranan sa Bag-ong Tugon. Ug dayon sa . . .

²⁹ Ang bulan mao'y landong sa adlaw. Ginareplektar lamang sa adlaw ang kahayag niini pag anaa kini sa luyo sa kalibutan. Ug nagahatag og kahayag ang bulan, aron makalakaw kita, inig magabii. Ug pagkaanindot nga hulagway ang aduna kita dinhi, usa pa ka maanindot nga hulagway: ingon nga ang adlaw nagarepsentar kang Cristo; ang—ang bulan pud nagarepresentar sa Iglesia. Mora sila'g bana ug asawa. Ug samtang wala si Cristo, nagareplektar ang Iglesia og mas gamay nga Kahayag, ang Ebanghelyo. Ug mao kini—kini ang Kahayag nga pagalaktan hangtud nga mosubang na usab ang Anak, dayon ang Iglesia ug ang Anak, ang bulan ug ang adlaw, magakahiusa. Kita n'yo? Ang bulan kabahin sa adlaw, ug ang Iglesia usab kabahin ni Cristo. Ug sa diha nga wala si Cristo, ginareplektar sa Iglesia ang Iyang Kahayag. Ug dayon sa ingon ka sigurado nga makita nato nga nagadan-ag ang bulan, nasayod kini nga nagadan-ag sàb ang adlaw sa kung asa man. Ug basta ginareplektar sa Iglesia ang Kahayag ni Cristo, nan buhi gayud si Cristo sa kung asa man. Amen. Palandunga n'yo kini.

³⁰ Karon, ang kasugoan mao'y tipo sa grasya, apan walay makaluwas nga gahum ang kasugoan. Ang kasugoan usa lamang ka . . . Ang kasugoan usa ra ka pulis. Ang pulis ang magbalhog kanimo sa bilanggoan, apan, nakita n'yo, grasya ang gikinahanglan aron mapahigawas kamo gikan sa bilanggoan. Kita n'yo?

³¹ Busa ang Dugo ni Cristo, ang Ebanghelyo, ang nagaluwas kanato gikan sa sala. Ginahimo lamang kitang mga makasasala sa kasugoan. Nagaingon ang kasugoan, “Usa ikaw ka makasasala. Dili ka mangawat. Dili ka manapaw. Dili ka magsaksi sa bakak.” Kita n'yo? Kini'y usa ka pulis nga nagaingon nga saypan ka ug sad-an ka. Apan ang Ebanghelyo mao ang maayong balita. Namatay si Cristo aron luwason kita

sa tanan natong mga sala, og mga kalapasan sa kasugoan. Mao nga namatay si Cristo aron mapahigawas kita.

³² Bueno, si Pablo, sa pagkakabig niya, wala siya sukad mikonsulta sa unsa man nga seminaryo, wala sàb siya mikonsulta sa kang kinsa man nga mga ministro. Apan namatikdan n'yo ba? Miadto siya sa Arabia, ug nagpabilin didto sulod sa tulo ka tuig, sa Arabia. Karon, kini'y, sa akong opinyon, nga ang . . .

³³ Karon, kinahanglan sà natong masabtan ang basihanan niini, aron atong mahibaloan kung unsa kini kamahinungdanon. Ug sa unang leksyon, niining gabhiona, hisgotan nato ang atong basihanan.

³⁴ Bueno, si Pablo kaniadto usa ka hawod nga magtutudlo sa Biblia, tungod kay gikatudloan man siya ilalum niadtong bantugan, dili-hitupngan og iladong si Gamaliel. Ug usa siya sa pinaka maayo niadtong panahona, kining bantugan nga magtutudlo mahitungod sa kasugoan ug sa mga propeta. Busa, namatuto gayud si Pablo sa niining mga butanga.

³⁵ Ug mao nga nagustohan nako siya niining paagiha, tungod sa niining dakung kapadayagan, og sa pagkamatinud-anon sa iyang kasingkasing, bisan usa siya ka mamumuno, nga miuyon sa pagpatay kang Esteban ug nakita mismo si Esteban nga gipatay pinaagi sa mga bato ug mga tibugol nga yuta nga gibato kaniya hangtud nga mamatay. Sa hunahuna ko natandog gyud siguro si Pablo sa dihang nakita niya nga gipataas ni Esteban ang iyang mga kamot ngadto sa Langit, ug miingon, “Nakita ko ang Kalangitan nga naabli. Nakita ko si Jesus nga nagatindog sa tuo sa Dios.” Ug miingon pa siya, “Amahan, dili Mo unta sila pagsang-atan niini nga sala.” Ug nahikatulog siya.

³⁶ Inyo bang namatikdan? Wala man siya namatay. Nahikatulog ra siya. Sama lang . . . Nagatoo ko nga wala gyud siya'y nabati nga usa ka bato. Sama lang sa usa ka masuso nga nagapauraray sa dughan sa iyang inahan, og nahikatulog, si Esteban nahikatulog ra usab sa mga bukton sa Dios.

³⁷ Aduna gyu'y sa kung unsang butang, kang Pablo, nga mitandog kaniya. Busa siya, sama sa kinsa mang tawo nga may kombiksyon, og nagapakigbatok Niini, miadto siya sa labaw'ng sacerdote ug mikuha og mga sulat. Ang ingon, “Ipadakop ko ang tanan nianang mga tawo nga nagahimo og ingon nianang mga kabanha, ug silang mga erehes;” nga gipakaingon kaniadto, nga sa karon ang tawag nato, usa ka “radikal nga panatiko,” o mora'g ingon niana, nga nagahimo kono og dakung kabanha ug nagapahinungdan og kagubot. “Among adtoon didto ug sulbaron kini.”

³⁸ Ug sa iyang dalan paingon didto, sa gamay'ng . . .dili halapad nga dalan nga sama sa atong ginabiyahan sa karon. Ug ang mga dalan sa Palestina kaniadto, gagmay lang man nga

mga dalan, nga sama sa ginaagian sa baka latas sa kakahoyan kon diin ang mga kabakahan, ug mga karnero, ug mga kabayo, ug mga asno, ug ang mga kamelyo, nagaagi pud sa kabungtoran.

³⁹ Ug si Pablo, sa iyang pagpaingon sa Damascus, mga udto, usa ka adlaw niadto, usa ka dakung Kahayag ang midan-ag ug nagpahapa kaniya sa yuta. Walay si kinsa man ang nakakita Niadto kondili si Pablo lang. Gusto kong matikdan n'yo kana. Ug dinhi mismo, dili baya kini akong kinaugalingon lang ha, apan para kini sa pagpaingon nato sa niining basihan. Aron inyong mahibaloan nga kadtong mao ra nga Jesus . . .

⁴⁰ Bueno, kaniadtong ania pa Siya sa yuta, miingon Siya, “Gikan Ako sa Dios, ug mobalik Ako ngadto sa Dios.”

⁴¹ Karon, kaniadtong gipangunahan Niya ang mga anak sa Israel, Siya mao kadtong Haligi nga Kalayo. Ug Siya’y nahimong unod, dayon mibalik Siya niadtong mao ra nga Haliging Kalayo. Ug sa dihang gihinagbo Niya si Pablo didto sa dalan paingon sa Damascus, Siya man kadtong Haligi nga Kalayo, kadtong Kahayag, kita n'yo, usa ka dakung Kahayag. Ug miingon si Pablo, “Si Kinsa ba Kining ginalutos ko?”

⁴² Ingon Niya, “Ako mao si Jesus, Nga ginalutos mo,” ang maong Kahayag. Oh, dili ba Siya kahibulongan?

⁴³ Ug ania sàb Siya, karong gabhiona, dinhi mismo uban kanato. Naretratohan pa man gani ang Iyang hulagway dinha, ang mao mismong Butang, kita n'yo, ang Haliging Kalayo, ang Kahayag, maingon sa kung unsa Siya kaniadto, “Mao sa gihapon kagahapon, karon, ug hangtud sa kahangturan.”

⁴⁴ Karon wala nakita sa mga lalaki nga kauban niya ang kadtong Kahayag, pero atua ra Kini didto bisan pa man. Mao sa gihapon.

⁴⁵ Karon, posible ba nga—nga adunay makakita kang Cristo sulod niining bilding pero wala na’y uban pa nga makakita Kaniya? Oo. Nahitabo na man kaniadto.

⁴⁶ Nahitabo na usab usa ka gabii kaniadtong gibilanggo si Pedro. Ug ang maong Kahayag misulod sa bilanggoan, ug gipukaw si Pedro, ug gilabyan mismo ang tigbantay sa sulod, ang tigbantay sa gawas, og milabay pa sa ganghaan, sa dakung ganghaan, ug sa ganghaan sa siyudad. Miingon si Pedro, “Tingali’g nagadamgo ra ako.” Ug mitan-aw siya sa palibot, pero nawala na ang Kahayag; si Cristo, ang Eternal, og walay katapusan nga Kahayag. Mao kana Siya. Karon, sa dalan paingon sa . . .

⁴⁷ Ug matikdi n'yo, ang usa pa ka butang, kung mahimo hisgotan na lang pud nato kini, misantop man gud kini sa akong hunahuna. Ang maalamon nga mga lalaki nga misunod niadtong Bitoon, gikan pa sila sa India, sa Sidlakan, pipila ka bulan, nga gilatas nila ang mga kawalogan ug mga disyerto (miagi pa sa

mga obserbatoryo; ug ginatan-aw nila ang oras sa gabii pinaagi sa mga bitoon) ug wala gayu’y magsasaysay o si kinsa man ang naghisgot nga nakakita sila og ingon niadto nga Bitoon kondili ang maalamon nga mga lalaki lamang. Tungod sila ra man gud ang gikatagana nga makakita Niadto.

48 Busa mahimo pud kamong makakita og mga butang nga mahimong dili makita sa ubang tawo. Para kanimo, Kini’y usa ka realidad. Pero para sa iyaha, dili gyud nila masabtan. Sama lang sa pagkabag-o; mahimo kang mabag-o ug matagamtaman ang mga panalangin sa Dios, og magainom lang—lang gayud sa mga panalangin sa Dios. Pero ang imong isigkatawo, nga nagalingkod tupad nimo, “Wala ma’y ni usa nga akong nakita.” Kita n’yo? Kita n’yo? Ingon niana. “Wala gyud nako masabti kini. Dili nako makita kung unsa gayud kini.” Bueno, dili lang gyud niya masabtan Kini. Kana lang. Pero, ikaw nakasabot.

49 Matikdi n’yo karon, si Pablo sa iyang pagpaingon didto. Ug sa dihadiha nga nahitabo kaniya kining mahimayaon nga kasinatian. . .Bueno, wala siya nagpabilin. . .Mao kana ang nakamaayo kang Pablo.

50 Karon, ang atong leksyon niining gabhiona dili man gyud ingon nga halawom. Mabaw ra kini nga leksyon, pero, oh, paingon na kita sa mga halawom, dili magdugay. Ug usa kini ka mabaw ra kaayo nga leksyon, pero sugod pa lang kini. Ug kung unsa gyud kini, kini’y usa ra ka butang, ang ituboy si Jesus Cristo. Si Pablo, sa sugod pa lang.

51 Ug sa wala pa niya buhata kini, usa si Pablo ka makinaadmanon sa Biblia. Ug ang usa ka makinaadmanon sa Biblia dili baya gayud ibasi ang iyang doktrina diha sa mga kasinatian. Dili, sir. Dili gyud nila ibasi ang ilang doktrina diha sa kasinatian. Hinoon mamahimo man kang magkaaduna og unsa mang matang sa kasinatian. Apan kinahanglan nga kini gayu’y MAO KINI ANG GINAINGON SA GINOO. Tinuod.

52 Bueno, diha sa Daang Tugon, aduna sila kaniadto og tulo ka nagkalainlaing mga paagi para masayran nila ang usa ka mensahe. Una, ang kasugoan, pinaagi lamang sa kasugoan. Dayon, aduna pud sila’y usa—usa ka propeta; usa ka magdadamgo; ug aduna sàb sila’y Urim Thummim. Karon tingali’g medyo halawom na kana.

53 Ang Urim Thummim mao ang tabon-sa-dughan nga anaa sa ginatul-ob ni Aaron diha sa iyang dughan. Aduna kadto’y dose ka bato: jaspe, sardio, carbuncle, ug, uban pa. Aduna sila niadtong tanang dose ka dagkung mga bato, nga atua niadtong tabon-sa-dughan, nga nagapakita nga siya mao ang labaw’ng sacerdote sa matag banay, sa dose ka banay sa Israel. Kining tabon-sa-dughan nakasab-it didto sa haligi sa iglesia. Ug pag nagpropesiya ang usa ka propeta, ug gusto nilang makasigurado kon husto ba ang maong propesiya, o dili, nan ang maong mga

propeta o mga magdadamgo motindog sa atubangan niining Urim Thummim, ug isulti niya ang iyang damgo o ang iyang panan-awon, og kung unsa ma'y nakita niya. Ug kung ang maong Sagrado nga Kahayag. . . Oh, nasabtan n'yo ba kini? Ang Dios sa kanunay nagapuyo man sa supernatural nga dapit. Ang kombinasyon niadtong mga bato, ang mga kahayag, ordinaryo lamang kadto hangtud nga motingog na ang maong tawo. Ug pag maigo na sa iyang tingog kadtong mga bato, kung dili kadto supernatural, nan magpabilin ra kadto nga mao ra gihapon. Apan kung supernatural kadtong tingog, nan ang tanan niadtong mga Kahayag dungan nga magreplektar og balangaw nga kolor. Amen. Kung ingon niana man, Dios ang nagpanulti niadto, “Kana’y Akong propeta.” O kaha, “Gikan Kanako kana nga damgo.” Mao nga nagahukom sila kaniadto sumala sa Urim Thummim.

54 Nahinumduman n'yo ba si Saul kaniadtong nag-backslide na siya? Ingon siya nga dili na kono siya makadamgo ni usa ka damgo. Ug ang propetang, si Samuel, patay na man kaniadto, ug mao nga wala na'y paagi. Ingon siya, “Bisan ang Urim dili na magpakigsulti kanako.” Wala na gyud. Mitindog si Saul sa atubangan sa Urim, ug ang iyang mga pulong mora na lang og walay-pulos nga tingog. Kita n'yo? Gibalibaran gyud siya sa Dios. Ug ang Urim Thummim, mao kadto ang kapanghimatuoran sa pagka-sacerdote ni Aaron. Ug human nga namatay si Aaron, si Moises, ang—ang maong tabon sa dughan gitay na diha sa haligi.

55 Bueno, nahunong na man ang pagka-sacerdote sumala sa laray ni Aaron kaniadtong namatay si Jesus. Ug karon, ingon nga gihimulag na ang kasugoan gikan sa grasya, aduna sa gihapon kita og usa ka Urim Thummim. Ug ginagamit Kini ni Pablo kaniadto. Kita n'yo? Ang Urim Thummim karong panahona mao ang Imortal, ang Eternal, og walay katapusan nga Pulong. Kita n'yo?

56 “Kay ang si bisan kinsa nga magataktak og bisan unsang butang gikan Niini nga Basahon, o magadugang og bisan unsang butang ngadto Niini.” Dili ko gusto og unsa mang butang gawas Niini, apan gusto ko ang tanan nga anaa Niini. Ingon niana ang Iglesia nga atong ginatinguha. Ug ang tanang butang gikinahanglan man nga mapamatud-an pinaagi sa Pulong.

57 Mao kana’y hinungdan nga dili maayo ang pagdawat kanako sa mga Pentecostal bag-ohay lang, tungod, ingon man ko, “Wala gyud ko makasabot kung unsa nga ang lana nga nagadagayday gikan sa inyong mga kamot, o ang dugo gikan sa inyong nawong, mao kono’y ilhanan nga naangkon n'yo ang Espiritu Santo.” Wala man kana sa Kasulatan ug ako—dili ko gayud madawat kana. Kinahanglan man gud nga magagikan kana sa Pulong.

⁵⁸ Ug kaniadto, si Pablo, gihigugma gayud niya ang Pulong. Busa, adisir siya nagtestimonyo bahin niining mahimayaong kasinatian nga iyang naangkon, miadto sa siya sa Egipto sulod sa tulo ka tuig. Nagatoo ko nga tulo ka tuig kadto, tulo ka tuig didto sa Egipto. Ug kabalo mo kung unsa ang ginatoohan ko nga iyang gibuhat? Nagatoo ko nga gikuha niya ang Daang Tugon, ug gisusi ang Daang Tugon, ug hingsayran niya nga mao gayud diay Kadto ang tinuod nga Mesias. Gikinahanglan man niya unang pamatud-an ang iyang kasinatian pinaagi sa Biblia. Amen. Oh, pagkanindot!

⁵⁹ Tan-awa n'yo siya kaniadtong atua siya sa bilangoan. Matikdi ninyo, nagkaaduna og—og panahon sa kinabuhi ni Pablo sa dihang gibilanggo siya kaniadto sa hataas nga panahon. Gisulat niya ang Basahon sa Mga Taga-Efeso. Gisulat niya kining Sulat para sa mga Hebreohanon. Kita n'yo? Nagkaaduna siya og higayon. Tungod gipahimutang man siya sa Dios didto sa bilangoan, ug gisulat niya kining mga Sulat para sa mga iglesia. Usa para sa iglesia sa Efeso. Nagsulat pud siya para sa iglesiang Pentecostal, nagkaaduna siya og daghang problema sa ilaha. Mas daghan siya og problema sa iglesiang Pentecostal kaysa uban pa. Mao sa gihapon hangtud karon. Apan mapasalamaton gihapon siya tungod kanila. Ang bugtong butang nga mahimo niyang itudlo kanila. . . Pag magakatigum sila: ang usa adunay laing pinulongan, ang usa adunay alawiton, ang usa adunay sensasyon, ang usa adunay nabati. Mao nga dili siya makasulti, makapamulong ngadto kanila mahitungod sa, “Eternal nga kasiguradohan.” Dili siya makapamulong ngadto kanila mahitungod sa, “predestinasyon.” Dili siya makasulti ngadto kanila, tungod sila’y mga bata pa man. Kinahanglan nga aduna gyud—kinahanglan nga aduna gyud sila og unsa man nga bation, o unsa man nga makita, o makasinati og dili-masabtan nga mga pagbati, ug, o unsa man sa palibot nila, nga mga kapanghimatuoran kono.

⁶⁰ Apan nagatoo ko, kaniadtong namulong siya sa Mga Taga-Efeso, nahimo niya nga mamulong mahitungod niini, “Kita’y gipili-nang-daan sa Dios aron mahimong mga anak nga lalaki ug mga anak nga babaye, ug gisagop kita ingon nga mga anak diha kang Jesus Cristo sa wala pa matukod ang kalibutan.” Tan-awa n'yo kana. Pagkanindot!

⁶¹ Matikdi n'yo sa pagdangat niya sa Basahon sa Mga Taga-Roma, ug sa uban pa. Sila’y mga hamtong na. Oh, nanagsulti pud sila og laing mga pinulongan, tinuod, ug aduna sab sila og ubang mga ilhanan sa Balaang Espiritu sa taliwala nila. Pero wala man sila nanaghimo og mga doktrina, ug mga sensasyon, ug diyutay’ng mga pagkurog, ug talagsaong mga pagbati.

⁶² Miingon si Pablo, “Kamo—kamo—kamo napahilayo na kaayo tungod niana. Sa diha nga kamo nanudlo na unta, pero mga bata pa man gihapon kamo ug nagkinahanglan og gatas.”

⁶³ Karon, mao kana ang kanunay kong gipakiglimbasogan para niining tabernakulo, nga dili gyud mamahimong usa ra ka pundok sa mga bata. Magpakahamtong na kita. Mobarug na kita sa dalanon. Oh, my! Mao kana.

⁶⁴ Bueno, miadto una si Pablo, didto, aron hibaloong kung ang iyang kasinatian mitakdo ba sa Biblia sa Dios.

⁶⁵ Oh, dili ba pagkaanindot unta, sa karong panahon, kung buhaton usab kana sa mga tawo, og kung ang atong kasinatian itakdo sàb nato sa Biblia sa Dios? Kung dili gani takdo, nan sayup ang atong kasinatian; tungod wala man mianinag niini ang Urim Thummim. Kung mianinag Kini, amen, nan nasayod mo nga nadawat n'yo Kini. Pero kung dili, bisan pa. . . dili ko igsapayan kung unsa pa kini kamaayo, kung unsa man ka daw tinuod kini; kung wala mianinag ang mga kahayag diha sa Urim Thummim, nan sayup kini.

⁶⁶ Ug bisan unsa pa kadaghan ang kasinatian nga imong nasinati, bisan unsa pa ka daw tinuod kini, bisan unsa pa kanindot ang pagpahayag niini, bisan unsa pa edukado kini, og kung unsa man kini kadakung galamiton para sa pagpangkabig og mga kalag; kung wala mianinag niini ang Pulong, sayup gihapon kini. Oo. Kinahanglan nga nahisubay gyud kini sa Pulong.

⁶⁷ Karon, nagatoo ako nga. . . adunay tunga ang dalan. Ang dalan, bueno, sa makadaghang higayon. . . nagatambong ako kaniadto sa usa ka iglesiang Nazarene. Panalanginan unta sa Ginoo silang minahal nga mga kaigsoonan. Kinaraan, binalaan nga mga Methodist ingon niana sila; church of God, Nazarene, Pilgrim Holiness, ug daghan pa nianang kinaraan og balaang mga iglesia. Ug pirmi nilang ginaawit kaniadto ang usa ka awit:

Nagalakaw ako sa maanindot og karaan nga dalan,
Nagapamahayag bisan asa man ako moadto,
Nga mas tinguhaon ko pa nga mamahimong
usa ka kinaraan nga Cristohanon, Ginoo,
Kaysa ang unsa mang butang nga nahibaloan ko.

⁶⁸ Maayo. Maanindot. Ug kaniadto nagahisgot pud sila mahitungod sa dalan sa pagkabalaan. Karon, kung inyong basahon kana, gikuha nila kana gikan sa Isaias, sa ika-35 nga kapitulo. Karon, kung matikdan ninyo, miingon siya, “Didto may usa ka dalan, *ug* usa ka alagianan.”

⁶⁹ Karon, ang *ug* usa ka pang-sumpay. Kita n'yo? Usa ka dalan, dili kini usa ka dalan sa pagkabalaan. “Usa kini ka dalan, *ug* usa ka alagianan, ug kini pagatawgon, ‘Ang alagianan sa pagkabalaan,’” dili nga dalan sa pagkabalaan. “Ang alagianan sa pagkabalaan!” Ug ang agianan sa usa ka dalan anaa mismo sa tunga sa dalan. Ingon *niini* ang pagkabuhat niini aron nga

anoron ra sa tubig ang mga basura, ngadto sa isig ka kilid, aron mapapabilin nga limpyo ang dalan. Kay kon dili, nan aduna gyu'y mga lim-aw lim-aw diha sa dalan, pirmi, kung dili husto ang pagkabuhat niini. "Ang agianan" mao mismo ang tunga sa dalan.

⁷⁰ Karon, dinhi *niini* nga bahin, pag nakabig na ang mga tawo, ang ilang mga hunahuna nakasentro na diha kang Cristo. Pero kung medyo manggialamon pa sila, ug dili nagapabilin sa pag-ampo, sila gyu'y mamahimong bugnaw, ug magahi, ug pormal, ug walay-pagpakabana. Ug kung sila pu'y medyo mga nerbiyoso, kung dili n'yo mamatikdan, sila'y mahimo gayud nga radikal ug mabagison, dinhi *niini* nga bahin, kita n'yo, nagapaingon sila sa mga sensasyon ug tanan na.

⁷¹ Karon, apan, ang tinuod nga Iglesia mao ang tinuod nga Ebanghelyo nga may maayong pangisip, nga anaa mismo sa tunga sa dalan. Dili kini mabugnaw ug pormal, dili usab kini panatisismo. Usa kini ka maayo gayud, kinaraan, mainit nga Ebanghelyo, og kinasingkasing nga gugma sa Dios, nga nagaagi sa tunga-tunga sa dalan, nga nagapanawag sa kadtong mga atua sa duha ka kilid. Husto kana. Karon ingon niana... Ug unsaon man ninyo sa pagdangat nianang Iglesia? Pinaagi mismo sa Pulong, ang Urim Thummim.

⁷² Bueno, gitinguha man ni Pablo nga mapadangat kini nga iglesia nganha mismo sa tunga sa dalan, busa miadto siya ug gitun-an sulod sa tulo ka tuig ang mga Kasulatan nga iyang nahibaloan. Mao nga, nasulat ni Pablo ang daku-daku nga bahin sa Bag-ong Tugon. Gipabuhat kini sa Dios sa iyaha tungod kay paingon na man kaniadto sa kapanahonan sa Gentil. Si Mateo, Marcos, Lucas, ug si Juan, ang upat ka Ebanghelyo, mga Judio sila. Pero gisulat ni Pablo ang kadaghanan sa mga sulat.

⁷³ Karon matikdi n'yo, karon, sugdan na nato sa paghisgot kining basihanan, kon diin iyang, gisulat Kini, didto sa bilangoan. Ug nasinati niya kining tanan nga kasinatian. Apan, sa sugod, gipamatud-an una kini nga kasinatian, ug mao kini ang iyang pinakamahinungdanon nga sulat mahitungod niini. Mao kini ang iyang pinakamahinungdanon nga sulat. Ang Mga Taga-Roma ug Mga Taga-Efeso, ug uban pa, mahinungdanon man usab, pero kini mao ang pinakamahinungdanon nga sulat.

⁷⁴ Karon, ang tibuok unang kapitulo nagatuboy kang Jesus, ug ginapaila Siya nga lahi kaysa Iyang pagka-propeta. Mao kini ang kinatibuk-ang tema karon. Paningkamotan kong hisgotan kini sa ingon ka paspas nga mahimo ko, aron dili kita magpabilin niini og dugay. Ang kinatibuk-ang tema *mao* ang pagbulag sa bag-ong kap...bag-ong...Ang ika-1 nga kapitulo *mao* ang pagpalahi kang Jesus gikan sa kinsa mang propeta, o sa unsa mang kasugoan, o uban pa, ug ginapakita kung Kinsa gayud

si Jesus. Karon matikdi, “Ang Dios.” Atong sugdan, sa unang pulong nga, “Ang Dios.”

Ang Dios, sa kar- . . . nga sa karaang mga panahon . . .

Ang buut ipasabot sa *karaan* “kaniadto,” kaniadtong panahon.

. . . sa nagkalainlaing mga panahon ug nagkalainlaing mga paagi misulti kaniadto ngadto sa atong mga ginikanan pinaagi sa mga propeta,

⁷⁵ Karon, kita n’yo, “Ang Dios, sa nagkalainlaing mga panahon, kaniadto, nagpakig-istorya Siya sa atong mga ginikanan pinaagi sa mga propeta.” Sa ingon nianang paagi Niya ginahatag ang Iyang Mensahe, pinaagi sa Iyang propeta.

⁷⁶ Ginapadala sa Dios ang Iyang propeta sama ni Elias, ni Jeremias, ug ni Isaias. Ug kung inyong himatikdan, sa tibuok kasaysayan sa kalibutan, wala gayud sukad nagpatungha ang iglesia og usa ka propeta. Susiha n’yo sa Daang Tugon, Bag-ong Tugon, o niining panahona, sa kaulahiang panahon. Ipakita n’yo kanako kon aduna ba’y propeta nga mitungha gikan sa iglesia sa kaulahiang panahon. Ipakita n’yo kanako kon duna ba’y usa nga, mitungha. Ug ipakita n’yo kanako kon duna ba’y usa ka higayon nga ang usa ka propeta, ang usa ka tinuod nga alagad sa Dios, wala gikondena sa pang-simbahang sistema sa kalibutan.

⁷⁷ Palandunga n’yo kini. Si Jeremias, si Isaias, ang tanan didto sa Daang Tugon, ila mang gipangkondena. Miingon si Jesus, “Inyong ginadayandayanan ang mga lubnganan sa mga propeta ug ginapaputi ang mga niini, ug samtang kamo man ang nagbutang kanila didto.” Tinuod kana.

⁷⁸ Ginapadayon gihapon kana sa iglesia. Tan-awa n’yo si San Patrick. Kamong mga Katoliko ginaangkon n’yo siya. Mas Katoliko pa man ko kaysa sa iyaha. Tinuod. Pero ginaangkon ninyo siya.

⁷⁹ Tan-awa n’yo si Saint Francis of Assisi. Ginaangkon pud nila siya. Mas Katoliko pa man ko kaysa sa iyaha.

⁸⁰ Tan-awa n’yo si Joan of Arc. Gisunog baya ninyo siya nga nakagapus sa poste, tungod nga usa kono ka balbal, tungod kay makakita siya og mga panan-awon ug siya’y espirituhanon. Gisunog n’yo siya nga nakagapus sa poste. Ug kadto nga babaye nagatuaw man unta alang sa kalooy, pero gisunog gihapon nila siya nga nakagapus sa poste. Mga usa ka gatus ka tuig human niadto, hingsayran nila nga siya usa diay ka babayeng-propeta. Usa siya ka alagad sa Dios. Oh, siyempre, nagbuhat kamo og dakung pagpenitensya: gikalot ninyo ang lawas sa mga pari ug gipangtambog kadto sa suba.

⁸¹ “Inyong ginadayandayanan ang mga lubnganan sa mga propeta, ug samtang kamo man ang nagbutang kanila dinha.” Husto. Wala sukad nagpatungha og usa ka tawo sa Dios

ang pang-simbahan nga sistema; wala kaniadto, wala pud sa karong panahon, ug wala gayud sa umalabot. Wala gyud sukad nahimong tema sa Dios ang giorganisa nga relihiyon.

⁸² Ngani ang pinaka-karaan nga organisadong iglesia sa kalibutan mao ang iglesiang Katoliko; ang kang Luther, ang ikaduha; dayon miabot si Zwingli; human ni Zwingli, miabot si Calvin; si Calvin, dayon, ang Anglican, mitungha ang mga Anglo-Saxon, pagkahuman ang iglesiang Anglican; ug si King Henry the Eighth, giprotestahan niya kini, ug uban pa; ug hangtud sa Wesley Methodist, ug mga Nazarene, Pilgrim Holiness; ug hangtud na sa kaulahian, ang Pentecostal, ang tanan giorganisa. Ug ginatudlo sa Biblia sa ingon ka klaro nga ang iglesiang Katoliko mao ang usa—usa ka babaye nga mahugaw'g-dungog, ug ang mga iglesiang Protestante ug ang ilang mga organisasyon mao ang iyang mga anak nga babaye, Pinadayag 17. Eksakto gyud kana. Busa sila'y . . .

⁸³ Dili ang mga tawo, ha. Aduna ma'y mga maayo diha sa tanan niana nga mga kaiglesiahan; mga balaan, og mga tawong luwas. Apan dili man ginatawag sa Dios ang Iyang katawohan pinaagi sa usa ka organisasyon. Kondili ginatawag Niya sila nga tagsa-tagsa. Nagapakighilambigit ang Dios sa tagsa-tagsa, kamo ma'y Methodist, Baptist, Protestante, ug Katoliko, o unsa man kamo. Tungod ang Dios, sa wala pa ang pagkatukod sa kalibutan, naila na kamo, ug kamo'y gipili-nang-daan ngadto sa Kinabuhing Walay Katapusan, o kaha kamo'y gitagana-nang-daan ngadto sa Eternal nga kalaglagan. Dili . . .

⁸⁴ Wala Siya magtinguha nga kamo mangalaglag, nga mangalaglag kamo. Apan, Siya ingon nga walay-kinutoban, sigurado gayud nga hingsayran na Niya ang katapusan gikan sa sinugdanan, kay kung dili nan dili Siya Dios. Busa wala mianhi si Jesus nganhi sa yuta aron lang moingon, “Bueno, tanawon Ko kung aduna ba'y malooy. . . Kung magpalansang Ako ug mamatay, nga magkalisud-lisud pa, tingali'g maghunahuna sila, ‘Bueno, ako. . .’ Matandog gyud niimi—niimi ang ilang mga kasingkasing, ug sila'y. . .” Dili man ingon niana ang pagbuhat sa Dios sa Iyang buluhaton.

⁸⁵ Mianhi si Jesus alang usa ka piho nga katuyoan, kana'y, ang luwason kadtong mga hingsayran na sa Dios, nga maluwas, sa wala pa ang pagkatukod sa kalibutan. Mao kana'y Iyang giingon. Husto kana. Busa kamo'y. . . “Kini dili sa kabubut-on sa tawo, o kaniya nga nagapaningkamot; kondili sumala sa Dios nga nagapakita og kalooy.” Gisulti kana ni Pablo. Kining mao ra nga tawo dinhi.

⁸⁶ Miingon siya, “Mao kana'y hinungdan nga masulti na daan sa Dios, sa wala pa man maipanganak si Esau o si Jacob, miingon na Siya, ‘Gihigugma Ko ang usa ug gidumtan ang usa pa.’” Sa wala pa matawo bisan ang usa sa duha ka batang

lalaki, hingsayran na sa Dios nga si Esau usa ka tikasan, ug hingsayan pud Niya nga si Jacob mao'y...gitinguha niya ang iyang pagkapanganay. Busa hingsayran na Niya, sa wala pa maporma ang kalibutan, ang mahitungod niini. Karon, atong hibaloon sa dili madugay kung Kinsa gyud kining nasayod na niini. Anaa kini dinhi niini nga kapitulo.

Ang Dios,...sa *nagkalainlaing* panahon ug sa *nagkalainlaing* paagi misulti...ngadto sa atong mga *ginikanan pinaagi sa mga propeta,*

Apan niining kaulahiang mga adlaw misulti kanato pinaagi sa iyang Anak, . . .

Unsa man ang gibuhat? “Misulti kanato sa niining kaulahiang mga adlaw pinaagi sa Iyang Anak.”

⁸⁷ Karon, sa hunahuna n'yo unsaon man, kana, nga mamahimong usa ka propeta? Kung ingon niana magkaaduna ba kita og usa ka propeta niining panahona? Walay pagduhaduha. Manulti ba Siya pinaagi kanato? Oo. Pero siya nga...Ang mga propeta sa panahon kaniadto mao ang Espiritu ni Jesus Cristo.

⁸⁸ Karon, ato kining ipaklaro, tungod kay sa hunahuna ko mora'g wala pa kini mituhop. Karon, ingon nga mora lang kini og Sunday school, busa buut natong masabtan gyud kini nga klaro. Kita n'yo?

⁸⁹ Matikdi n'yo. Hisgotan ta ang Espiritu sa Dios nga atua kang Moises kaniadto, bug-os gayud nga...mao ang paghulagway nang daan mahitungod kang Jesus Cristo. Ang tanang mga tawo sa Daang Tugon nagahulagway nang daan sa krus. Si Moises, nga natawo nga usa ka matahum nga bata, gitago sa may mga tangbo, gikuha gikan sa iyang mga ginikanan, og uban pa, ug nahimong... Usa siya ka hari, o usa—usa ka lider, maghahatag-og-balaod, tigpangaliya, sacerdote. Ang tanan kung unsa siya kaniadto nagahulagway nang daan kang Cristo.

⁹⁰ Tan-awa n'yo si Joseph, hinigugma sa iyang amahan, pero gidumtan sa iyang mga igsoon, ug gibaligya sa halos katloan ka buok nga salapi. Gitambog ngadto sa gahong, gitooan nga patay na; gihaw-as. Sa paglutos kaniya, naluwas ang magbalanatay sa vino, ug nalaglag ang mag-iihaw; duha pud ka kawatan ang atua didto sa krus. Ug dayon sa napahigawas na siya, nga gihaw-as gikan niadtong gahong, ug gipalingkod sa tuo ni Faraon, ang pinakadakung komersyo...ang—ang—ang nasud nga mipildi sa tanang uban pa sa kalibutan. Ug walay si kinsa man ang makaduol kang Faraon gawas kon moduol usa' sila kang Joseph; si Jesus usab nga nagalingkod sa tuo sa Dios, ug walay tawo ang makaduol sa Dios gawas nga pinaagi ni Cristo. Ug pagmohawa sa trono si Joseph ug molakaw, adunay mga lalaki ang mouna kaniya, nga nagasinggit ug nagabudyong sa mga trumpeta, ginapatingog ang trumpeta, og nagaingon, “Mangluhod mo! Paanhi na si Joseph.”

91 Ug pagmoabot na sàb si Jesus, usa ka trumpeta ang pagapatingogon, ug ang tanang tuhod mangluhod, ug ang tanan magasugid. Oo, sir. Ingon niana Siya.

92 Ug sa dihang namatay si Joseph, nagbilin siya og usa ka pagpahanumdum kanila nga nagapaabot alang sa ilang kagawasan.

93 Gipatong ko ang akong kamot sa karaang lungon, dinhi dili pa lang dugay, ginama kadto gikan sa tingga. Ug ang iyang lawas gipapabilin. . . ang mga bukog ni Joseph. . . Miingon, “Ayaw ko ninyo ilubong dinhi, kay sa umalabot nga adlaw, pagaduawon kamo sa Dios.” Usa man gud siya ka propeta. “Pagaduawon kamo sa Dios.” Ug miingon, “Sa pagpaingon ninyo sa yutang saad, dalha usab ang akong mga bukog.”

94 Mao nga ang matag Hebreohanon kaniadto, nga binunalan ang likod ug dugoan, mahimong motan-aw sa maong lungon ug moingon, “Moabot ang adlaw, nga makagawas gyud kita.”

95 Nagbilin pud si Jesus og usa ka pagpahanumdum, usa ka lubnganan nga walay sulod. Pagmoabot ang adlaw nga ilubong na kita, ug ang atong mga minahal sa kinabuhi, ug madungog na ang gagmay'ng mga tibugol nga yuta, sa dihang nagaingon na sila, “Abo sa abo, ug abog sa abog, ug yuta sa yuta.” Apan, igsoon, mahimo man kitang motan-aw ngadto sa tabok dagat, ngadto sa usa ka lubnganan nga walay sulod. Moabot ang adlaw, makagawas sàb kita dinhi. Mopauli na kita sa atong Panimalay. Moabot na Siya. Ang tanan-tanan gikatipo gayud.

96 Matikdi n'yo si David, nga gisalikway sa kaugalingon niyang mga kabanay, gipalagpot sa kaugalingon niyang mga kabanay. Bisan usa siya ka hari sa Jerusalem, pero gipalagpot gihapon siya didto sa Jerusalem sa kaugalingon niyang mga kabanay. Ug samtang nagatungas siya didto sa Bukid sa Olivo, milingi siya ug mihilak. Gisalikway man siya.

97 Walo ka gatus ka tuig gikan niadto, ang Anak ni David, ang Hari sa Jerusalem, atua usab sa maong bungtod ug mihilak, tungod kay gisalikway pud Siya.

98 Kadto mao ang Espiritu ni Cristo nga atua kang David. Ang tanan gayud naghulagway nang daan sa krus. Silang mga propeta kaniadto namulong sa Iyang Ngalan. Nagkinabuhi sila sa Iyang Ngalan. Namuhat sila sa Iyang Ngalan. Tinuod. “Ang Dios sa nagkalainlaing mga panahon ug nagkalainlaing mga paagi nagpakig-istorya sa atong mga ginikanan pinaagi sa mga propeta, apan sa niining kaulahiing adlaw pinaagi na sa Iyang Anak.”

99 Busa ang mga propeta ug ang mga espirituhanong mga tawo, niining panahona, nagareplektar lamang kang Cristo. Kaniadto, pinaagi sa kasugoan nagbarug sila, nga nanagpaabot. Dinhi sa karon sila nagabarug, nga nagatan-aw balik, tungod sa grasya.

100 Sa Mga Hebreohanon 11, sa ulahing kapitulo, kanunay kong gihunahuna kana. Sa ulahing kapitulo, sa kaulahiing bahin sa ika-11 nga kapitulo sa Mga Hebreohanon, sa dihang naghisgot siya mahitungod kang Abraham. Sa maong mahimayaong kapitulo bahin sa pagtoo, ug sa katapusan dinha, miingon siya, “Sila nanagpanglakaw nga nanagsaput og mga panit sa mga karnero ug mga kanding, ug nanag-antus sa kawalad-on, ug gipanagpamutol pinaagi sa gabas. Nanagpanglakaw sila, walay maadtoan, gidumtan, ug gitamay, ug gilutos. Nga kanila, kining kalibutana dili takus sa ingon nianang mga tawo.”

101 Dayon mitindog si Pablo ug miingon, “Apan sila dili mamahingpit kung wala kita.” Kay sila mitan-aw lamang *ngadto* sa krus, pero kita nagatan-aw man ta *pinaagi* sa krus. Anaa kanato ang Espiritu ni Cristo human nga Kini nahimong tawhanong lawas ug mipuyo ipon kanato. Nahianhi kita pinaagi sa Espiritu Santo, ingon nga mao ang mas maayo nga plano.

102 Ug usahay mahunahuna ko kung unsa kaha ang ginapaabot sa Cristianismo karong panahona. Ang usa ka magwawali pagmosangyaw ngadto sa usa ka lungsod kinahanglan kono nga...o usa ka bag-ong simbahan o usa ka bag-ong katungdanan, nga nagapatawag sa iyang kaugalingon nga usa kono ka propeta, molakaw dinha, og moingon, “Bueno, kung hatagan nila ako og ingon ka daghang kuwarta. Kung mahatag nila kanako ang pinakanindot nga sakyanan. Kung ilang...Kung patas-an nila ang akong suweldo matag unom ka bulan.”

103 Kinahanglan kono nga maanaa kanato ang pinakamaayo. Kinahanglan kono nga anaa kanato ang pinakaanindot nga mga balay. Kinahanglan kono nga anaa kanato ang pinakaanindot nga mga bisti. Unsa na lang kaha’y buhaton nato pag motindog kita sa atubangan niadtong mga tawo nga nanagpanglakaw, nga nanagsapot og mga panit sa mga kanding ug mga karnero, nga walay ni usa ka luna nga mapatongan sa ilang mga ulo, ug nanagpanglakaw didto sa mga disyerto? Ug aduna lang gani magbiaybiay kanato moundang na dayon kita sa pagsimba ug dili na mobalik. Unsa diay ang gikinahanglan sa Cristianismo sa karong panahon. Angay gyud kitang maulaw sa atong mga kaugalingon.

Oh Dios, malooy Ka kanamo.

104 Sa kaniadtong panahon, nagpakigsulti Siya pinaagi sa mga propeta, apan niining panahona pinaagi na sa Iyang Anak. Kana mao ang pulong sa propeta, kaniadto. Kini mao ang Pulong sa Anak, sa karong panahon. Oh, dalaygon ang Ngalan sa Ginoo!

105 Sa laing pagkasulti, kung sa landong kamo nagatan-aw, sa negatibo, mahimong masayup gyud kamo. Apan Kini naporma na man, klaro na ang hulagway. Kadto mao’y pinaagi sa propeta; kini mao’y pinaagi sa Iyang Anak. Kadto mao’y pinaagi sa usa ka

negatibo; kini mao'y pinaagi sa usa ka positibo. Amen. Nasabtan n'yo ba? Wala gyu'y kahigayonan nga mapakyas. Usa gyud kini ka positibo nga butang, sa niining panahon pinaagi sa Iyang Anak. Oh, pagkaanindot gayud!

*...nga iya nang gitudlo nga manununod...
(Oh, pagkanindot!)...manununod sa tanang mga butang,...*

¹⁰⁶ Unsa man kadto? Usa kadto ka pagkatudlo. Oh, paminaw mo. Gikatudlo Siya, si Cristo, ingon nga manununod sa tanang mga butang. Oh, nasayod niana ang yawa, didto pa sa tanaman sa Eden, nakita n'yo, sa dihang nadungog sa yawa kadto nga Pulong niadtong adlaw, nga gihukman ang maong mga tawo. Ang ingon, “Tungod kay gikan man ikaw sa abog, sa abog ikaw mobalik; ug ang Binhi sa babaye magasamad sa ulo sa serpente.” Usa ka gikasaad nga Binhi.

¹⁰⁷ Mao nga kanunay na gayud gibantayan ni Satanas ang maong Binhi. Sa dihang natawo si Abel, ingon siya, “Mao na kana siya, mao na kana ang binhi.” Ug gipatay niya si Abel. Ang iyang anak, nga si Cain, ang nagpatay kang Abel. Ug sa pagkamatay ni Abel, ingon siya, “Napuo ko na ang binhi.” Gipatay niya kadto. Ingon siya, “Napuo ko na.” Apan, sa pagkamatay ni Abel, ang pagkahimugso kang Set mao ang pagkabanhaw pag-usab. Tan-awa kung unsa ang ilang mga kaliwat.

¹⁰⁸ Ang kaliwatan ni Seth, nangahimong, mapainubsanon, matarung nga mga tawo; hangtud kang Enoch; hangtud kang Noe, og hangtud na sa katapusan niadtong paglaglag sa kalibutan pinaagi'g lunop.

¹⁰⁹ Matikdi n'yo usab ang kaliwatan ni Cain, nangahimong maantigo nga mga tawo, edukado, siyentipiko. Dili ba ginaingon sa Biblia. . . Dili ba miingon man si Jesus, nga, “Ang mga anak sa kalibutan labi pang maalamon kay sa mga Anak sa Ginghamlan?” Tan-awa n'yo ang kaliwatan ni Cain hangtud sa karong panahon: maantigo, edukado, maduhaduhaon, relihiyoso kaayo; kita n'yo, relihiyoso kaayo, pero mga siyentista, mga magtutukod, mga bantugang tawo.

¹¹⁰ Tan-awon na lang nato ang mga bantugang tawo. Tan-awa n'yo si Thomas Edison, og ang daghang mga bantugan nga tawo. Tan-awa n'yo si Einstein, ang utok sa kalibutan, kono, sa karong panahon, ang pangutok sa kalibutan. Apan wala kita gapaninguha nga mogamit og pangutok. Kondili atong ginabatonan ang Hunahuna nga diha kang Cristo, ug nagatan-aw ta niining Pulong, ug nagasugid nga mao gyud kini.

¹¹¹ Ang mga doktor sa medisina, hinoon saludar man kita sa ilaha tungod sa unsa man nga atong nabenebisyo pinaagi nila, apan kadaghanan sa ilaha mga maduhaduhaon man, og dili nagatoo sa Dios. Matikdi n'yo ang maantigo ug maalamon nga

mga tawo karong panahona. Anaa sila dinha niana nga bahin, sa bahin ni Cain.

¹¹² Apan matikdi n'yo ang mga mapainubsanon ug mga maaghop. Aduna sila og pagkabanhaw pag-usab. Oh, dalaygon ang Ngalan sa Ginoo! Mao kana. Matikdi.

. . . gihimo niya siya nga manununod sa tanang mga butang, nga pinaagi kaniya usab gibuhat niya ang mga kalibutan;

Si kinsa man ang nagbuhat sa mga kalibutan? Si Cristo. “Gibuhat ni Cristo ang mga kalibutan?” Oo, sir. Maghisgot pa kita og dugang.

Nga sanglit siya mao dinha ang dan-ag sa iyang himaya, ug ang mao gayud nga dagway sa iyang presensiya, . . .

Ang dan-ag sa kang Kinsang himaya? Himaya sa Dios. Ang dayag nga dagway sa kang Kinsang Presensiya? Sa Dios. Oh, gusto ko gayud kini!

. . . o ang mao gayud nga dagway sa iyang pagkamao, ug nagasapnay sa tanang mga butang pinaagi sa pulong. . .

Mao kana. Ang Pulong, nga nagasapnay sa tanang mga butang. Miingon si Jesus, diha sa Mateo 24, “Ang mga langit ug yuta mangahanaw, apan ang Akong mga Pulong dili gayud mahanaw.” Ginasapnay Niya ang tanang mga butang.

¹¹³ Ginapaningkamotan sa siyensiya nga ipakaubos Kini, ug nagaingon, “Usa Kini ka karaan na nga Basahon. Hinubad na man Kini.”

¹¹⁴ Bisan ang iglesiang Romano Katoliko, miingon si Obispo Sheen, “Gihubad na man kana sa makaupat o makalima ka higayon, ug wala ka na’y makuha Niini. Dili mo na mahimong ikinabuhi Kini bisan pa kung gustohon nimo.” Apan ginasapnay Niya ang tanang mga butang pinaagi sa Iyang Pulong. Amen. Ingon niana ang panghunahuna ko mahitungod Niini. Nagatoo ako sa Biblia.

. . . sa pulong sa iyang gahum, (aduna gyu’y gahum sa Pulong), sa diha nga nakabuhat na siya sa paghimlo sa atong mga sala, . . . (matikdi n’yo dinhi) . . . milingkod sa tuo sa Halangdon sa kahitas-an;

¹¹⁵ Unsa ba ang gipaningkamotang buhaton ni Pablo? Gipaningkamotan niyang ipakita nga gituyo sa Dios ang tanang mga butang diha kang Cristo, ug nga si Cristo mao gayud ang nadayag nga dagway sa Dios. Ang tanang uban pa nga bahin sa tibuok kapitulo nagahisgot pud sa kung unsa nga mas hataas Siya kaysa mga Manulonda, mas hataas kaysa tanang mga gahum. Ginasimba Siya sa mga Manulonda. Gipaningkamotan sàb ni Pablo nga himayaon Siya.

116 Karon, gusto kong sulayang . . . Kung dili ko man mahisgotan ang uban pa niini, basta ang tanang uban pang bahin niini mahitungod na sa paghimaya kang Cristo. Ang ginasulti ni Pablo dinhi, sama sa ika-11 nga ikapitulo, ug tanan na nagahisgot pud kana mahitungod sa kalibutan. Ingon niya, “Kang kinsa—kinsa nga Manulonda Siya miingon, ‘Ikaw mao ang Akong Anak, gipanganak Ko Ikaw karon?’” Kita n’yo?

117 “Sa katapusan sa kalibutan, sila mangalaglag. Ang kalibutan pagalaglagon. Apan ang . . . Ug ang tanang mga butang sa kalibutan pagalaglagon. Iyang lukoton sila sama sa sa usa ka kupo. Sila mangadaan, ug pagaalid-an, ug mangawala. ‘Apan Ikaw magapabilin. Magapabilin Ikaw hangtud sa kahangturan. Ikaw mao ang Akong Anak. Gipanganak Ko Ikaw karon, ug dili gayud malaglag, og magalingkod sa tuo sa Halangdon.’”

Unsa man ang buut ipasabot sa *tuo*? Dili ingon nga, ang Dios adunay tuo og nga adunay nagalingkod dinha. Ang *tuo* nagakahulogan og “gahum ug pagbulot-an,” adunay pagbulot-an sa tanang butang sa Langit ug yuta. Ug ang tibuok kalangitan ug kayutaan gibuhat pinaagi Kaniya.

118 Karon, Kinsa man kining halangdon nga Lalaki, kining halangdong Tawo, nga si Cristo? Ania, ang Dios diha sa Amahan, Anak, ug Balaang Espiritu, pero dili . . . Usa ka trinidad, pero dili Kini usa ka trinidad sa mga persona. Kondili usa kini ka trinidad sa opisina, sa usa ra ka Dios.

119 Siya mao ang Amahan nga nagapanguna kaniadto sa mga anak sa Israel. Kadto mao ang Iyang opisina, ingon nga gamhanang Amahang Jehovah. Ug mipuyo Siya nganhi sa yuta, og gitawag nga Anak. Ug karon nagapuyo na Siya sa Iyang Iglesia, og gitawag nga Espiritu Santo. Dili nga tulo ka Dios; kondili usa ra ka Dios diha sa tulo ka opisina: Amahan, Anak, ug Balaang Espiritu.

Pero ang mga tawo gapaninguha gyud nga himoon Siya nga tulo ka managlahi nga Dios, ang Dios nga Amahan. Mao kana’y hinungdan nga, sa mga Judio, dili n’yo mahimo, dili n’yo madala kini ngadto sa usa ka Judio, dili, gayud. Dili niya kana madawat. Tungod aduna ma’y sugo kaniya, nga, “Ako’y Usa ra ka Dios.” Aduna lamang og usa ka Dios.

120 Didto sa Africa nagabautismo sila sa tulo ka managlahi nga paagi: nagabautismo sila sa makausa para sa Amahan, ug sa makausa para sa Anak, ug sa makausa na pud para sa Espiritu Santo. Ang Apostolic Faith mission sàb, nagabautismo sila sa makatulo ka higayon, nga pinaatubang, para kono sa Iyang kamatayon. Ang ginatawag nilang Full Gospel sa West Coast, o sa East Coast, nagabautismo pud sa makatulo ka higayon nga pinahayang, ang ingon nga Siya kono . . . sa paglubong Kaniya.

Ug adunay miingon, “Kaniadtong namatay Siya, natumba man Siya nga paatubang.”

¹²¹ May usa pud nga miingon, “Kadali lang. Ginalubong mo man ang tawo nga pahayang.” Naglalisay pa sa gagmay’ng mga butang, sa dihang, pareho ra man silang sayup; pareho nga sayup, sumala sa Kasulatan.

Kini mao ang Urim Thummim. Kini ang nagasulbad.

¹²² Karon, ania, ihulagway sa nato kini ug para makita kung unsa—kung unsa’y hitsura niini, karong gabhiona. Ania kini, kung gusto ninyong makita kini. Sulod sa halos baynte-singko ka tuig nga nahimo akong ministro, gitun-an ko kana. Ug kanunay kong gihunahuna ang mga gasa sa iglesia. Unsa man kana nga mga gasa? Pagpropesiya, pagsulti og laing mga pinulongan, paghubad og mga pinulongan, Balaanong kapadayagan, og uban pa, kanang tanan nagaabot pinaagi ni Cristo.

¹²³ Karon tan-awa n’yo. Si Cristo mao ang Ulo sa tanang mga butang. Ug Siya mao ang Ulo sa Iglesia. Ug nakakita na ba kamong usa ka dakung diyamante? Ang usa ka daku kaayo nga diyamante nga husto ang pagkatapyas, magkaaduna kini og mga gagmay’ng piraso nga gitiltil gikan niini, gitapyas gikan niini. Mao kana ang nagapahimo sa diyamante nga tinuod. Para sa unsa man diay ang maong gagmay’ng mga tinapyas? Ang tinuod nga diyamante, ang paagi sa pagkaporma niini, gitapyasan kini; ang tinuod nga diyamante, pag makaplagaan kini.

Nakaadto ako kaniadto sa Kimberley. Kamo, daghan sa inyo, ang nakadungog na nga mahimo ra kamong mamunit didto og mga diyamante sa dalan, tinuod kana. Kami ni Billy, ug ni Mr. Bosworth. Ang presidente sa minahan og diyamante didto sa Kimberley, ang nagdala . . . Siya ang akong usher sa panagtigum didto. Ug ila kaming gidala didto. Ug sa gawas sa . . . Ginamina nila kadto, oh, mga dise-siete ka gatus ka piye ang kalawmon sa yuta. Aduna sila’y makaplagaan, nga usa ka asul nga bato, daku nga asul, sama niining asul nga bato nga makuha n’yo dinhi. Ug kadtong mga lumad, ilang ginapasuon sila ilalum sa yuta nga dise-siete ka gatus ka piye ang kalawmon, aron mao’y magmina niadto, og para mapapabilin nga hataas ang presyo. Ngani kon moadto ka sa sapa didto, ila kadtong ginapabantayan nga may gilay-on nga gatusan ka milya. Kay kon makadala ka kono og duha ka ten-gallon nga timba, ingon niya, ug masudlan kadto, nga mapuno og—og balas, ug kung makauli man gani ka nga dala kadto, nan mamahimo gyud ka nga multimilyonaryo kono, tungod daghan man kaayong diyamante ang mahiuban niadto. Pero gikinahanglan nilang motrabaho gayud sa pagmina niadto, aron mapapabilin nga hataas ang presyo niadto.

¹²⁴ Karon, ang diyamante, pag makuha na kini, usa lang man kini ka daku, hamis, lingin, nga mora’g, piraso sa bildo. Adunay

asul nga diyamante, itum nga diyamante, esmeralda, ug usa ka tin-aw nga diyamante, puti nga diyamante. Pero pag makuha na kini . . . Dayon pag pormahon na kini para magamit na, adunay bahin sa maong diyamante nga kinahanglan únang tangtangon. Ug kinahanglan nga tangtangon ang—ang mga gagmay'ng piraso gikan niini. Tiltilon ang mga gagmay'ng piraso, tungod kay, pag madan-agan kini sa direktang kahayag, nga nakaingon *niana*, mosidlak na kini. Ang gagmay'ng piraso, ang paagi sa pagtapyas niini, mao ang nagapasidlak. Tapyasan kini, sapsapan, ug dayon, pag mahuman na, mosidlak na kini. Ug mosidlak ang berde nga kahayag, mosidlak pud ang asul nga kahayag, ug tingali aduna pa'y, esmeralda nga kahayag, ug pula nga kahayag. Ug nagkalainlaing mga kahayag ang mosidlak gikan niini, nga sama sa balangaw nga kolor. Ang tawag nila niana, “kalayo sa diyamante.”

¹²⁵ Bueno, ang matag usa niana nga mga kahayag nagarepresentar og mga gasa. Apan si Cristo, lamang, ang bugtong Diyamante. Ug Siya Mao Ang mianhi, ug nabun-og, ug gisamaran, ug gitapyas, aron nga Iyang mareplektar ang Iyang Kaugalingon ingon nga Kahayag nganhi sa kalibutan. Siya mao ang Ginoong Diyamante.

¹²⁶ Mahunahuna n'yo ba, sa wala pa kaniadto magkaaduna og yuta, sa wala pa magkaaduna og kahayag, sa wala pa magkaaduna og bitoon, sa wala pa magkaaduna og unsa man? Aduna na'y dakung Tuboran nga nagapadagayday, sa Espiritu, ug nagabugwak gikan niini nga Tuboran ang pinakaputli nga gugma, tungod kay wala na ma'y bisan unsa nga mobugwak gikan niini gawas sa gugma. Karon, kita, ang ginatawag nato nga gugma, sa karon, mao ang tinuis nga gugma. Apan sa diha nga madawat nato ang pinaka-kinaiyahan, o ang diyutay'ng tipik niining gugma nga ania sa kinasuloran nato, ginabag-o niini ang tibuok natong panghunahuna.

¹²⁷ Dayon gikan dinha adunay usa pa nga nagadagayday, gikan niining dakung Tuboran, ang Diyamante, ug gitawag kini og pagkamatarung, bug-os nga pagkamatarung. Karon, mao kana'y hinungdan nga gikinahanglan natong magkaaduna og kasugoan. Mao kana'y hinungdan nga kinahanglan adunay paghukom ang kasugoan. Kay kung walay paghukom nga nagasunod sa kasugoan, nan walay mahatag nga kaayohan ang kasugoan. Ug pag napahamtang na sa kasugoan ang paghukom, nga nagahatud og kamatayon, wala gayu'y si kinsa man nga makabayad sa silot kondili ang Dios lang Mismo. Ug gibayaran Niya ang atong silot nga kamatayon, ug giangkong Niya ang atong mga sala, aron nga mamahimo kita nga pagkamatarung sa Dios pinaagi Kaniya.

¹²⁸ Karon, sa diha nga midan-ag kining mahimayaon nga mga Kahayag, o ang mahimayaong mga silaw sa Espiritu: gugma, pakigdaít, mao lang man kana ang anaa, Dinha.

Wala didto'y pag-antus. Wala—wala didto'y pagdumot, ni ang pagkamadinauton; dili man gud mahimo nga maggikan kana niining Tuboran. Tungod si Jehovah man kadto. Kadto mao si Jehovah nga Dios. Ug karon, sama sa tawag niini sa mga teologo, usa ka theophany ang migula gikan Dinha, nga gitawag, sumala sa Kasulatan, ang “Logos,” ang Logos nga migula kaniadto gikan sa Dios. Malisud kini isaysay, apan kabahin Kadto sa Dios.

¹²⁹ Karon, mao kini ang nahitabo. Oh! Pasensya na. Ako—ako—bag-ohay lang baya akong naghisgot bahin niini, pero ginadala man gud ko niini dinha nga gusto sàb gyud nako. Kita n'yo? Ang Logos, ug kining dakung Tuboran, kining dakung Tuboran sa Espiritu nga walay sinugdanan o walay katapusan; kining gamhanang Espiritu hinay-hinay nga naporma, sa paglalang, ug ang Logos nga migula gikan Niini mao ang Anak sa Dios. Kini lang ang bugtong makita nga porma kaniadto nga aduna ang Espiritu. Ug usa Kini ka theophany, nga nagakahulogan og usa ka lawas, ug ang maong lawas sama sa usa ka tawo.

¹³⁰ Nakita Kini ni Moises kaniadtong miagi Kini duol sa . . . sa—sa bato. Ug gitan-aw niya Kini, og miingon, “Mora kadto og likod nga bahin sa usa ka tawo.”

Ingon niana usab nga matang sa lawas ang atong madawat pag mamatay na kita dinhi. “Kung kining yutan-on nga tabernakulo matun-as man, aduna na kita'y usa nga nagahulat.” Mao Kini kadto. Ug kadto mao ang theophany nga mao ang Anak sa Dios. Kadto nga Anak, kadto nga Logos, nahimong unod, tungod kay gipahimutang man kita sa unod. Ug ang theophany, ang Logos, nahimong unod, dinhi sa taliwala nato, ug Kini wala na'y lain kondili puloy-anan, kay kadtong tibuok Tuboran nagapuyo man diha Kaniya. Oh, nasabtan n'yo ba? Atua Kini. Kini mao kadtong Usa, nga, anaa . . .

¹³¹ Tan-awa n'yo dinhi. Moabli sà kita karon mismo sa Mga Hebreohanon, sa ika-7 nga kapitulo, sa makadiyut lang mahitungod—mahitungod sa grasya, ingon nga ginapanahunotan kita sa Dios. Atong tan-awon kung unsa ang hitsura niini dinhi. Si Abraham!

Unsa pa ba ka taas ang atong oras? Aduna pa kita'y diyes minutos. Sige. Hisgotan sà nato kini, dayon tapuson nato kini sa sunod, sa sunod, o sa Dominggo, kon itugot sa Ginoo.

¹³² Nagapauli na kaniadto si Abraham gikan sa pagpatay sa hari.

Kay kini si Melchisedec, hari sa Salem, . . .

Pila man sa inyo ang nasayod kung asa, kung kinsa, kung unsa ang Salem? Mao ang Jerusalem.

. . . hari sa Salem, principe sa Dios nga labing hataas, nga misugat kang Abraham nga nagapauli gikan sa pagpamatay sa mga hari, ug nanalangin kaniya;

Paminaw mo.

Kang kinsa usab si Abraham mihatag sa ikapulo sa tanan; sanglit una sa tanan kung hubaron mao'y Hari sa pagkamatarung, . . . unya usab ang Hari sa Salem, nga sa ato pa, ang Hari sa pakigdait;

Walay amahan, walay inahan, walay kagikanan, nga walay sinugdan sa mga adlaw, bisan katapusan sa kinabuhi;. . .

133 Usa ka Hari nga mikanaug gikan sa Salem, ug misugat kang Abraham nga gikan kaniadto sa pagpamatay sa mga hari. Ug kini nga Hari walay amahan, walay inahan, walay sinugdanan sa mga adlaw o katapusan man sa kinabuhi. Si kinsa man ang nahinagbo ni Abraham? Karon palandunga n'yo. Wala Siya'y amahan; wala Siya'y inahan. Wala Siya'y panahon kon kanus-a Siya nagsugod, ug wala pud Siya'y panahon kon kanus-a Siya matapos, busa kadtong mao ra nga Hari sa Salem sigurado gayud nga buhi pa sa gihapon hangtud karong panahona. Amen. Nasabtan n'yo ba kini? Kadto nga theophany mao ang Anak sa Dios. Unsa man ang Salem? Ang Jerusalem nga atua sa Itaas, nga si Abraham, nga gipanalanginan, nangita, nangkaplag, gapaninguha sa pagpangita sa maong Siyudad kinsang Magtutukod ug Magbubuhat mao ang Dios. Milakaw siya nga nagasapot og mga panit sa mga karnero ug mga kanding, sa bisan asa, nag-antus sa kawalad-on, naglakaw, ug nangita og usa ka Siyudad kinsang Magtutukod ug Magbubuhat mao ang Dios. Ug nahinagbo niya ang Hari sa maong Salem, nga mikanaug, ug gihatagan niya Siya og ikapulo sa tanang mga inagaw niya sa gubat. Amen. Siya kadto. Oh, Igsoong Graham, Siya kadto. Siya mao kadto.

Nakita Siya pag-usab ni Abraham. Usa niadto ka adlaw atua si Abraham sulod sa balongbalong. Mitan-aw siya, tungod aduna ma'y nagaabot didto, ug nakita niya ang tulo ka lalaki nga nagaabot.

134 Kabalo mo, aduna gyu'y butang sa usa ka Cristohanon, nga maila niya ang Espiritu sa diha nga makita niya Kini. Sa diha nga iyang . . . Nakaila gyud siya niini. Aduna gyu'y sa kung unsang Espirituwal nga butang niini. Ang mga butang Espirituwal maila ra pinaagi sa Espirituwal nga pagpang-ila. Kabalo mo. Oo, maila gayud niya kini, kung siya'y tinuod gyud nga natawo na pag-usab. "Ang Akong mga karnero nakaila sa Akong Tingog."

135 Ug nasayod siya nga aduna gyu'y sa kung unsang butang didto. Mao nga midagan siya pagawas ug ingon siya, "Sumulod Ka, Ginoo ko. Lingkod sa. Pabilin usa sa makadiyut.

Magkuha ako og usa ka tinapay ug akong ibutang sa Imong kamot. Hugasan ko ang Imong mga tiil. Magpahulay sa' Ka, pagkahuman magpadayon Ka na sa Imong panaw, kay miduaw Ka—Ka man kanako.” Didto sa yuta nga dili-katuboan, gipili niya ang malisud nga dalanon, ang dalanon kauban sa pipila ka mga tinamay nga iya sa Ginoo.

Samtang, si Lot nagkinabuhi nga dato gayud, kadtong iyang pag-umangkon nga atua didto, apan nagkinabuhi pud lagi siya sa kasal-anan. Kasal-anan gyud ang kasagaran nga ginapamunga sa pagka-dato.

¹³⁶ Ug gipasulod Sila ni Abraham, samtang mikuha siya og diyutay nga tubig ug gihugasan niya ang Ilang mga tiil. Midagan siya ngadto sa kabakahan, ug mikuha og matambok nga nating baka gikan sa maong panon sa mga baka, ug gipaihaw kadto; gihatag kadto sa usa ka sulogoon, aron sa paghikay. Ug miingon, “Sarah, masaha ang imong harina.”

Kabalo na man mo kung unsa ang magmasa, ang buut ipasabot, niini. Kabalo mo, si mama kaniadto adunay usa ka karaang, matang sa sisip, nga ginabutang niya sa—sa may tadyaw sa harina. Nakakita na ba mo og usa niana nga adunay sala-an? Ug kon aduna kamo'y sisip, nga inyong ipang-ukay sa harina, kabalo na mo; ug iduot nga nakaingon *niini*, ug ipang-ukay kini, nga ingon niana. Nakita ko si mama nga ginabuhat kana, sa makadaghang higayon kaniadto, ang kadtong sisip, aduna kadto'y medyo lingin nga butang nga may sala-an. Mokuha siya og harina ug salaon niya kadto nga nakaingon *niana*, kabalo na mo, ug uyog-uyogon kadto, nga nakaingon *niana*. Dayon kuhaon kadtong sisip ug ukayon ang harina, nga nakaingon *niana*, aron masala kadtong tanan. Ug moadto na dayon kami ug ipagaling ang among harina didto sa dakung galingan; ug ang dagkung mga galingan, kabalo mo, dagku pud, ang mahimo niadto nga tinapay nga ginama sa mais. Makagabas gud ka og mga troso sa tibuok adlaw, pag mokaon ka niadto.

¹³⁷ Ug, miingon, “Mag-masa ka og pipila ka harina, sa gilayon. Ug magluto ka og mga tinapay diha sa abohan, sa gilayon.” Ug nagpakuha pud sila og gatas gikan sa baka ug nakakuha og pipila ka gatas. Ug ila kadtong, gihimong, mantekilya. Ug pagkahuman miadto sila ug nag-ihaw og nati nga baka ug nagkuha og pipila ka karne, ug giprito nila ang karne. Aduna na didto'y gatas, tinapay nga ginama sa mais, ug aduna pud sila'y mantekilya para ipahid sa init nga mga tinapay. Oh, pagkalami gayud niadto. Ug ila kadtong gipahid tanan sa tinapay. Ug iya na kadtong gidala sa gawas, ug gibayang kadto para niadtong tulo ka Lalaki.

¹³⁸ Ug samtang nagapangaon Sila, sige pud Silang galantaw ngadto sa Sodoma. Ug wala magdugay, mitindog na Sila

ug hinay-hinay nang nanagpanglakaw. Ug miingon Siya, “Abraham . . .” Miingon, “Dili Mo kini malilong kanako.”

139 “Dili Ko malilong kanimo kung unsa ang pagabuhaton Ko. Moadto Ako didto. Ang mga sala sa Sodoma miabot man sa Akong igdulongog.”

Si kinsa man ang maong Lalaki? Nga nalukop og abog ang Iyang bisti, ug nagalingkod didto samtang nagakaon og karne sa usa ka nating baka, ug nagainom og gatas gikan sa baka, ug nagakaon og pipila ka tinapay nga ginama sa mais, nga may mantekilya. Si kinsa man kining talagsaon nga Lalaki? Duha, o tulo Sila, nga nagalingkod didto. Nalukop og abog ang Iyang bisti. Oh, oo, “Gikan pa Kami sa halayo nga Nasud.” Oo, halayo gayud. Ug busa miingon Siya . . . Bueno, si Kinsa man gyud Sila?

140 Miingon Siya, “Dili Ko malilong kang Abraham, ingon nga nakita Ko nga siya mao ang manununod sa yuta.” Amen. “Ginapadayag Ko ang Akong mga tinago,” sa laing pagkasulti, “ngadto kanila nga mga manununod sa yuta.” Dinha na unta niana nga kahimtang ang Iglesia sa karon. Husto. Nga nadawat ang mga Tinago sa Dios, nahibalo kung unsaon sa pagminatarung, ug pagpanglihok, ug kung unsa’y angay’ng buhaton, ug kung unsaon sa paglakaw, ug kung unsaon sa pagkinabuhi. Mga manununod kita sa yuta. Tinuod. Ginapadayag Niya Kini kaninyo, tungod kay dili man Siya’y molilong og unsa man kanato. Mao kana kon nganong ginabantayan nato kining mga butang nga mahitabo.

Moingon ra ang kalibutan, “Ah, usa ra man kana ka pundok sa panatisismo.” Pasagdi lang sila nga magsulti niana. Ang manununod sa yuta nasayod man niining mga butanga. [Blangko nga bahin sa teyp—Ed.]

. . . kay sila paganganlan nga mga anak sa Dios.

Bulahan sila nga mga maaghop: kay sila magapanunod sa yuta.

Ginapahayag Niya ang Iyang mga tinago ngadto kanila, ginapadayag kini ngadto kanila, ginapakita kanila kung unsa ang angay’ng buhaton ug kung unsaon sa pagkinabuhi, nga talikdan ang mga butang nga iya sa kalibutan; magalakaw nga diosnon ug magakinabuhi nga diosnon, sa niining kasamtangang kalibutan, og magakinabuhi nga kauban Siya. Pasagdi ang kalibutan kung unsa ma’y gusto nilang isulti.

141 Ug miingon Siya, “Dili Ko malilong kini nga tinago kang Abraham, tungod kay, nakita Ko nga siya mao ang manununod sa yuta. Apan,” ingon Siya, “Moadto Ako aron laglagon ang Sodoma. Moadto Ako.”

142 “Unsa ma’y Imong buhaton, Mister? Taga asa Ka man? Para sa unsa ba ang tanan niini?”

143 Hingsayran pud nato, nga miingon Siya, “Ug usa pa ka butang, Abraham, naghulat ka og baynte-singko ka tuig alang niining saad nga gihatag Ko kanimo. Naandam mo na ang tanang lampin, ang—ang mga perdible ug tanan na, para niining maong bata, baynte-singko ka tuig na ang milabay. Pero nagahulat ka sa gihapon Kanako. Mao nga pagaduawon Ko ikaw, sa panahon, pagmoabot na, ang panahon, sa sunod nga bulan Ako magauban kanimo.”

144 Ug si Sarah, nga atua sa likod nga sulod sa balongbalong. Ug samtang kining Lalaki nakatalikod Siya sa balongbalong, nagapakig-istorya kang Abraham, nga nakaingon *niini*. Ug miingon si Sarah, “Huh!”

145 Miingon Siya, “Nganong mikatawa man si Sarah?” Ho-ho-ho! Giunsa man kadto? Medyo usa kadto ka pagbasa sa hunahuna, dili ba? “Nganong mikatawa man si Sarah?”

 Miingon si Sarah, “Wala. Wala man ko mikatawa.”

146 Miingon, “Oh, oo, mikatawa ka baya.” Nahadlok si Sarah. Nangurog siya. Si kinsa man diay Kadto, nga nakahibalo sa kung unsa’y iyang ginabuhad didto sulod sa balongbalong? Mao Kadto ang mao gihapon nga Dios nga kauban nato karon. Mao ra Mismo. Hingsayran Niya ang tanan mahitungod niini. Kita n’yo? Ginapadayag lang Niya kini sumala sa imong gikinahanglan. Kita n’yo?

147 “Unsa ma’y imong gikataw-an?” Kita n’yo, nakatalikod gani Siya niadto. Gisulti kana sa Biblia, nga, “Nakatalikod Siya sa balongbalong.” Apan, hingsayran gihapon Niya. “Naunsa man si Sarah, dinha, nga mikatawa man siya nga nakaingon *niini*?” Nakita n’yo? Busa, ingon Niya, “Pagaduawon Ko ikaw.”

148 Si kinsa man kining talagsaon nga Tawo? Kabalo ba mo kung unsa’y nahitabo? Milakaw Siya pagawas ug nawala ra. Ug miingon ang Biblia nga Kadto mao ang Dios nga Makagagahum-sa-tanan, si Jehovah, ang kadtong dakung Tuboran, kadtong Theophany, kadtong Logos.

149 Miingon kanako ang usa ka magwawali, usa ka higayon kaniadto, miingon, “Igsoong Branham, dili gyud siguro ka mohunahuna nga ang Dios kadto, dili ba?”

150 Ingon ko, “Miingon man ang Biblia nga ang Dios Kadto, si Elohim.” Nga, Siya mao ang Dios nga Makagagahum-sa-tanan, ang El Shaddai, tinuod, ang Maghahatag-og-Kusog, ang Maglilipay. Amen.

151 Oh, gibati ko ang pagkarelihiyoso! Palandunga n’yo kini. Ania, Siya mismo. Karon ipakita ko kaninyo dinhi kung si Kinsa Siya, aron nga inyong masayran kung Kinsa ba gayud ang Anak. Si Jesus kadto, sa wala pa Siya nagkaaduna og tawhanong Ngalan nga, “Jesus.”

152 Atua sila didto sa may tuboran niadtong adlaw. Ug nanagpanginom silang tanan, kabalo mo, ug, “Sa mga tubig didto sa kamingawan,” ug mga ingon nianang butang. Siya miingon. . . Nanagpangaon sila og manna ug mga ingon niadto. Miingon sila, “Ang among mga ginikanan nanagpangaon man og manna didto sa kamingawan, sulod sa kuwarenta ka tuig.”

153 Miingon si Jesus, “Ug sila, ang matag usa kanila, nangamatay.” Miingon, “Ako mao ang Tinapay sa Kinabuhi nga nagagikan sa Dios, sa Langit. Siya nga mokaon niini nga Tinapay dili gayud mamatay.”

154 Miingon, “Bueno, ang among mga ginikanan nanag-inom man pud gikan sa Espiritu, gikan sa usa ka espirituwal nga Bato nga atua didto sa kamingawan, nga nagasunod kanila.”

155 Miingon Siya, “Ako mao kadtong Bato.” Himaya! San Juan, sa ika-6 nga kapitulo.

“Aba,” ingon sila, “unsa?”

“Oo. Tinuod kana.”

156 “Aba,” adunay miingon, “Ikaw’y. . . Wala Ka pa gani’y singkwenta anyos.” Siyempre, ang Iyang buluhaton man gud ang medyo nakapatigulang Kaniya, apan Siya’y traynta’y anyos pa lang kaniadto. Miingon, “Usa man Ka ka tawo nga wala pa milagpas sa singkwenta anyos ang pangidaron, ug moingon Ka nga nakita Mo na si Abraham, nga walo o siyam ka gatus ka tuig na nga namatay? Kung ingon-ana nasayod kami nga usa Ikaw ka yawa.”

157 Miingon Siya, “Sa wala pa si Abraham, MAO NA AKO.” Mao kana Siya. Si kinsa ba ang MAO NA AKO? Nga usa ka walay katapusan nga Ngalan sa tanang henerasyon. Kadto mao ang. . . kadtong Haligi nga Kalayo didto sa nagadilaab nga sapinit, “AKO MAN ANG MAO AKO.” Siya kadto, ang Theophany nga Iyang gibuhat kaniadto, nga gitawag nga Anak sa Dios, ang MAO NA AKO, ang Jehovah.

158 Miingon si Tomas, “Ginoo, ipakita kanamo ang Amahan ug igo na kini kanamo.”

159 Miingon, “Dugay na Akong ania uban kaninyo, pero wala pa ba ikaw makaila Kanako?” Ingon pa, “Kon nakita n’yo Ako, nakita n’yo na ang Amahan. Nganong moingon man mo, ‘Ipakita, Mo, kanamo ang Amahan?’ Nga Ako ug ang Amahan Usa ra man. Ang Akong Amahan nagapuyo Kanako. Usa lamang Ako ka tabernakulo nga gitawag og Anak. Nagapuyo Kanako ang Amahan. Dili Ako ang nagabuhat sa maong mga buhat, ang Akong Amahan kini nga nagapuyo Kanako. Siya ang nagabuhat sa mga buhat, dili Ako.”

160 Karon, sa pagtindog niya didto, usab, nakita Siya ni Moises, ang Iyang likod nga bahin, miingon, “Mora kadto og likod sa usa ka tawo,” ang maong Logos nga migula gikan sa Dios.

¹⁶¹ Dayon unsa man ang nahitabo? Kini mao ang Dios. Ug ang hinungdan nga gikan sa Logos nahimo Siyang unod . . . Unsa . . . ? Unsaon man ninyo . . . ? Unsa ma'y nahitabo kaniadto? Singko minutos sa wala pa kadto, Siya'y usa ka . . . Siya mao ang Logos. Apan unsa ma'y gibuhath Niya? Iya lamang gituyhod . . .

¹⁶² Bueno, ang atong mga lawas naglangkob kini og dise-sais ka nagkalainlaing mga elemento sa kalibutan. Nasayod kita niana. Naglangkob kini og potash, ug—ug—ug diyutay'ng calcium, ug—ug petrolyo, ug cosmic light, ug mga atom, ug uban pa. Giusa kining tanan, para mahimo kini nga lawas, nga naggikan sa abog sa yuta. Mokaon kamo og pagkaon. Pag mokaon kamo og pagkaon, nagakahimo kana nga . . . gikan sa abog, ug ingon nga naggikan kini sa abog, nan nagabalik ra—ra pud kini. Ang inyong unod, ang inyong unod, wala kana'y kalahian sa kabayo, o sa baka, o sa unsa pa man. Unod lang gihapon kana.

¹⁶³ Pero, aba, ginahimaya n'yo ang unod; nga unta ang espiritu man ang adunay kalag dinha sa kinasuloran, igsoon ko. Tinuod kana. Ug ang inyong unod abog lang man kana sa yuta, sama sa hayop. Ang inyong unod pareho ra man sa hayop. Ug kung mangibog kamo sa unod ug sa butang nga makita ninyo, mangibog sa kababayan-an, mangibog sa tanan niining nagkalainlaing mga butang, hayop man gihapon kini. Husto. Husto. Dili gyud ninyo angay'ng buhaton kana. Pangunahan kamo sa Espiritu sa Dios nga makapadayon ug ipahimutang kamo sa usa ka mas hataas nga dapit kaysa dinha. Eksakto gayud.

¹⁶⁴ Karon, ug ania, kining gamhanang Theophany nga atua didto. Unsa . . . Kadtong gamhanang Jehovah nga Dios, kabalo ba mo kung unsa'y Iyang gisulti? Gituyhod lang ang Iyang bukton ug mikuha og pipila ka atom, mikuha og diyutay'ng kahayag, ug gibubo kadto, nga ingon *niini*, ug, “Whew,” usa na dayon ka lawas, ug misulod Siya mismo niadto. Kana lang.

¹⁶⁵ Miingon, “Umari ka, Gabriel,” ang bantugang Arkanghel. Ug, “Whew.” “Sumulod ka *dinha*.”

¹⁶⁶ “Umari ka, Michael,” ang Manulonda nga anaa sa Iyang tuo. “Whew.” Kay ang . . . “Sumulod ka *dinha*.”

¹⁶⁷ Ang Dios, ug ang maong duha ka Manulonda, mikanaug dinhi nga anaa sa tawhanong unod, ug miinom og gatas gikan sa baka, mikaon og mantekilya nga hinimo sa gatas, ug mikaon og pipila ka tinapay nga hinimo sa mais, ug mikaon og karne sa nati nga baka. Ang duha ka Manulonda ug ang Dios. Mao kana'y giingon sa Biblia. Kadto mao si Melchisedec, nga nahinagbo ni Abraham, nga gikan kaniadto sa pagpamatay sa mga hari. Mao kadto ang Anak sa Dios.

¹⁶⁸ Padayon tà, dinhi sa Mga Hebreohanon, sa ika-7, miingon, “Apan nahimong sama sa Anak sa Dios.” Mao kana Siya. Gibuhath Niya ang tanang butang pinaagi Kaniya. Ug milakaw

Siya didto, ug gibalik kadtong abog ngadto sa abog pag-usab, ug misulod na pabalik sa Himaya.

¹⁶⁹ Ug ang mga Manulonda, sa pagluwas Nila kang Lot ug Mrs. Lot, ug nagalingi-lingi pa gihapon kini. Miingon Siya, gisultihan sila nga dili na kadto buhaton pag-usab. Ug misulod Sila dayon pabalik sa—sa Presensiya sa Dios.

¹⁷⁰ Karon, pagkadaku gayud sa paglaum nga atong naangkon sa niining dakung Pagtoo nga atong ginaalagaran niining gabhiona! Ang buhi nga Dios, ang Jehovah, ang Haligi nga Kalayo, ania uban kanato. Ginapakita ang Iyang Kaugalingon diha sa gahum, ug buhat, ug paghimaya. . . Gitugotan sila nga makuhaan Siya og Retrato, ang mao ra nga Jehovah. Ang Anak sa Dios nga naggikan sa Dios, mibalik sa Dios, ug nagapuyo sa Iyang Iglesia hangtud sa kahangturan. Mao kana Siya.

¹⁷¹ Gisulat Niya ang atong mga ngalan diha sa Iyang Basahon, nga may gipanumpaang na saad pinaagi sa Iyang Kaugalingon, kay wala ma'y laing labing daku nga Iyang kapanumpaang, nga pagabanhawon Niya kita sa kaulahiing adlaw. “Ang mokaon sa Akong Unod, ug moinom sa Akong Dugo, adunay Kinabuhing Walay Katapusan, ug pagabanhawon Ko siya sa kaulahiing adlaw. Ang moduol Kanako, dili Ko gayud isalikway. Ang nagapatalinghug sa Akong Pulong, ug nagatoo Kaniya nga nagsugo Kanako, adunay Kinabuhing walay katapusan, ug dili na pagahukman sa silot, kondili miagi na gikan sa kamatayon ngadto sa Kinabuhi.”

¹⁷² Kadtong Mao sa gihapon igo lang nga gituyhod ang bukton ug mikuha og pipila ka calcium ug potash, ug, “Whew,” ug mao na kadto usab. Ug ang akong ngalan anaa na sa Iyang Basahon. Ho-ho! Ho-ho-ho-ho! Unsa ma'y kabalak-an ko kung nagatikubo na ang akong mga abaga, kung nagakatigulang na ako? Wala gayud. Wala gyu'y ni usa ka tipik sa kabalaka.

¹⁷³ Igsoong Mike, panalanginan ang imong kasingkasing, usa sa niining mga adlaw, igsoon, pag mobudyong na ang dakung trumpeta, ang maong tingog, ug monaug na si Joseph. Alleluyah! Moingon Siya, “Mga anak!” “Whew.” Ug mamahimo kitang, mamahimo nang sama sa Iyang dagway; batan-on na hangtud sa kahangturan, wala na'y pagkatigulang; ang balatian, mga problema, og mga kagul-anan mahanaw na. Sa buhing Dios ang himaya!

¹⁷⁴ Siya kanang ginagamit Niya aron makapakigsulti, karon, ang Iyang Anak. “Sa Nagkalainlaing mga panahon ug nagkalainlaing mga paagi Siya misulti kaniadto pinaagi sa propeta, apan sa niining kaulahiing adlaw pinaagi na sa Iyang Anak, nga si Jesus Cristo.” Nagapakigsulti Siya sa kasingkasing sa matag tawo nga Iyang gitawag. Kung nabati ninyo ang Iyang Tingog o nadungog Siya nga nagapanuktok sa inyong kasingkasing, kung mahimo ayaw gayud isalikway Kini.

Mag-ampo kita.

¹⁷⁵ Langitnong Amahan, karong gabhiona, ingon nga malipayon gayud kami nga masayran, sa pag-abli niining Sulat sa Mga Hebreohanon, kung unsa nga gibalikan gayud ni Pablo ang mga Ebanghelyo. Ayaw niyang dawaton kini basi lang sa usa ka sulti-sulti o sa usa ka kasinatian. Gitinguha gyud niya nga masayran namo kung unsa ang Kamatuoran. Ug mao nga iyang gibalikan ang mga Ebanghelyo, ug iyang . . . gibalikan ang Daang Tugon, ang Ebanghelyo nga gikawali ngadto kanila. Ug nakita niya, pinaagi dinha sa Daang Tugon, ang tanang mga landong ug mga tipo. Mao kana kon nganong ania kanamo karong gabhiona kining mahimayaong Basahon sa Mga Hebreohanon. Ug nasabtan namo Kini, Ginoo, ug gusto gyud namo Kini. Ug sa tanang nangagi nga mga kapanahonan, gisunog Kini, gisalibay Kini, gisulayan Kining walaon, apan padayon gyud gihapon Kini nga nagakaylap. Kay miingon man Ka, “Ang mga langit ug yuta mangahanaw, apan ang Akong mga Pulong dili gayud mahanaw.”

¹⁷⁶ Dayon moingon ang maduhaduhaon, “Bueno, ingon lagi ka, ‘Gisulat kini ni Pablo.’” Dili man si Pablo, kondili ang Dios nga atua kang Pablo; ang taglalang nga Persona nga atua sa kinasuloran ni Pablo.

¹⁷⁷ Sama lang sa atua kang David, kaniadtong miingon siya, “Dili Ako motugot nga ang Akong Balaan makakita og pagkadunot, ni dili Ko pagabiyaan ang Iyang kalag didto sa sheol.” Ug gipahinabo sa Anak sa Dios kana nga mga Pulong gikan niadto nga propeta, ug miadto mismo sa kinahiladman sa impiyerno. Ug miingon, “Gub-a n’yo kining tabernakulo, ug Akong patindogon Kini sa ikatulo ka adlaw.” Ug gibuhat gyud Niya, tungod kay dili man mahimong mapakyas ang Pulong sa Dios; ni usa ka tipik dili gyud mapakyas. Ginapasalamatan gayud namo ang Dios tungod niini, kining gamhanang Urim Thummim, ug ang masayran nga ang among mga kasinatian karong gabhiona, Ginoo, ginaaninag dinhi mismo niining Biblia! Kami’y mga natawo na pag-usab, og naangkon na ang Balaang Espiritu.

¹⁷⁸ Minahal nga Dios, kung aduna ma’y lalaki o babaye nga ania karong gabhiona, batang lalaki o batang babaye, nga wala pa sukad nakasaksi niini, unsaon man nila pagkabanhaw kung walay Kinabuhi diha kanila? Oh, moingon sila, “Aduna man ko’y Kinabuhi.”

¹⁷⁹ Apan miingon man ang Biblia, “Siya nga nagapatuyang sa kalipayan patay na samtang siya buhi pa. Ginaingon mo nga aduna ka’y Kinabuhi, apan patay ikaw. Nagapamahayag ka,” ang ingon sa Biblia, “nga aduna ka’y Kinabuhi, apan patay ikaw. Ginaingon mo nga ikaw dato ug walay nakulang kanim; apan wala ka mahibalo nga ikaw makaluluoy, ug kabus, ug hubo, ug

buta, ug wala mahibalo niini.” Ug ingon na niana ang kahintang sa mga kaiglesiahan karong gabhiona, Ginoo. Wala gyud nila makita kining mahimayaon, og mahinungdanong mga butang.

Ang masayran nga ang gamhanang Jehovah nga Dios, Nga makapamuhat lamang pinaagi sa . . . Miingon Siya, “Dalha n’yo Kanako kanang gagmay’ng mga isda.” Kinahanglan Niyang kuhaon ang isda aron—aron maghimo og usa ka butang pinaagi niadto. Ginapakita, nga ang pagkabanhaw kinahanglang magkaaduna pud og usa ka butang, aron makahimo og usa ka butang pinaagi niini. Dili lamang Siya naghimo og isda, kondili naghimo pud Siya og luto na nga isda, ug luto na nga tinapay. Ug gipakaon Niya ang lima ka libo pinaagi sa lima ka gagmay’ng isda. . . . gagmay’ng mga tinapay ug duha ka isda. Oh Ginoo, anaa kadto sa Iyang mga kamot, ug Siya mismo mao ang Magbubuhat. Apan gikinahanglan Niya usa’ og usa ka butang diha sa Iyang kamot.

Dios, hinaut nga maipahimutang namo ang among mga kaugalingon diha sa Iyang mga kamot, karong gabhiona, ug moingon, “Oh Dios, dawata ako sa kung unsa ako. Ug kon karon na ang katapusan sa akong kinabuhi, nan ipapataliwan ako nga dala-dala kining paglaum nga ania sa kinasuloran ko, nga nahibalo nga natawo na ako pag-usab, ug ang Imong Espiritu nagapamatuod kanako, ug ginapamatud-an ang akong espiritu, nga ako’y Imong anak nga lalaki, o Imong anak nga babaye.” Ug sa kaulahiang adlaw, pagabanhawon Mo sila. Itugot kini, Amahan.

¹⁸⁰ Ug samtang nakaduko ang atong mga ulo, aduna ba’y gustong magpataas sa iyang kamot, moingon, “Hinumdumi ako, Igsoong Branham, sa pag-ampo. Gusto kong mailhan ako sa Dios sa dihang. . . sa dili pa ako mobiya niining yutaa, nga mailhan Niya gayud ako nga pagatawgon Niya ang akong ngalan. Motubag ako.” Panalanginan ka sa Ginoo anak. Panalanginan ka sa Dios, ug ikaw; ug ikaw, gining. Aduna pa ba’y lain? Ipataas lang ang inyong kamot. Moingon, “Iampo ako, Igsoong Branham.” Mao kana’y atong buhaton. Panalanginan ka sa Dios, batan-ong babaye. Maayo kana.

¹⁸¹ Karon, samtang nakaduko ang inyong ulo, nga nagaampo, awiton ko ang usa ka berso niini nga awit:

Covet not this world’s vain riches,
That so rapidly decay,
Build your hopes on things Eternal,
They will never pass away!

Hold to God’s unchanging hand!
Hold to God’s unchanging hand!
Build your hopes on things Eternal,
Hold to God’s unchanging hand!

182 Samtang nagatugtog siya karon, ug nakaduko ang inyong ulo, mahimo n'yo bang ipataas ang inyong kamot, moingon, "Oo, Ginoo, ania ang akong kamot"? Unsa ma'y mahimo niini? Ginapakita niini nga ang imong espiritu, diha sa sulod mo, nagdesisyon na. "Gitinguha ko ang Imong kamot, Ginoo." Panalanginan ka sa Dios, gamay'ng batang babaye. "Ipataas ko ang akong kamot." Panalanginan ka sa Dios, gamay'ng batang babaye, dinhi sa ubos. Maayo kana, palangga. Ang Dios, abi nimo, nalipay gyud nga makita ka nga ginabuhat kana. "Pasagdi ninyo ang gagmay'ng mga bata nga moduol Kanako."

183 "Gitinguha ko, Dios, nga gunitan Mo ang akong kamot. Ug nianang adlaw, gitinguha kong maanaa diha sa Imong kamot; nga, pag magtawag Ka, moduol ako." Oo, sama ni Lazarus kaniadto. Panalanginan ka sa Dios, igsoong babaye.

When our journey is completed,
If to God you have been true,
Fair and bright your home in Glory,
Your enraptured soul shall view.

Unsa na ma'y buhaton n'yo karong, higayona?

Hold to God's unchanging hand!
Hold to God's unchanging hand!
Build your hopes on things Eternal,
Hold to God's unchanging hand!

184 Langitnong Amahan, pipila ka mga kamot ang nanagpataas, dinhi niining diyutay'ng panagtigum, karong gabhiona, ingon nga gitinguha nilang manghawid, karong gabhiona, sa Imong walay-pagkausab, Eternal nga kamot. Ingon nga nasayod kami nga kung unsa man ang gikatugyan nganha Kanimo... miingon Ka, "Ako... Ang tanan nga gikahatag Kanako sa Amahan magaari Kanako, ug walay ni usa kanila ang malaglag. Ug pagabanhawon Ko sila sa kaulahiang adlaw. Dili gayud mahimong malaglag, dili mahimong hukman, kondili aduna na'y Eternal, Kinabuhing Walay Katapusan." Ug aduna lamang og usa ka Kinabuhing Eternal. Nagagikan kana sa Dios, lamang. Ang Dios kana. Ug nahimo kaming kabahin sa Dios, nga kami gayu'y mga anak nga lalaki ug mga anak nga babaye sa Dios. Sa nabatonan na namo ang Espiritu sa Dios, nagahunahuna kami nga sama na sa Dios. Ang pagkamatarung ug pagkabalaan na ang among ginahunahuna, ug nagapaningkamot kami sa pagkinabuhi aron mapahimut-an Siya.

185 Itugot, Ginoo, nga kana nga matang sa Kinabuhi mosulod gayud sa matag tawo nga nagpataas sa ilang kamot. Ug ang mga nagpataas unta sa ilang mga kamot, pero wala nagpataas, ginaampo ko nga magauban Ka unta sa ilaha. Itugot kini, Amahan. Ug pag matapos na ang panaw, matapos na ang kinabuhi, hinaut nga managsulod kami sa pakigdait nianang adlaw, uban Kaniya, kon diin dili na kami matigulang pa, dili

na magmasakiton, og wala na'y problema. Hangtud nianang higayona, ipapabilin kami nga masadyaon ug malipayon, nga nagadayeg Kaniya, kay amo kining ginapangamuyo sa Iyang Ngalan. Amen.

¹⁸⁶ Ang tanang mga magtotoo, karon, ipataas nato ang atong mga kamot ug awiton tà kanang koro.

Hold to God's unchanging hand!
 Hold to God's unchanging hand!
 Build your hopes on things Eternal,
 Hold to God's unchanging hand!

¹⁸⁷ Karon ato kining laylayan. Samtang nagalaylay kamo niini, sa inyong katapad, moingon kamo, "Panalanginan ka sa Dios, igsoon." Pakiglamano kamo sa kang kinsa man nga katapad ninyo. "Panalanginan ka sa Dios." Sa isig ka kilid n'yo ha. Sa isig ka kilid, makiglamano kita. "Panalanginan ka sa Dios, igsoon. Ang Dios magauban kanimo." "Tukora n'yo ang inyong mga paglaum diha sa mga butang nga Walay Katapusan."

Doc, nasayod ko nga atua kini didto, igsoon. Nasayod ko nga gikan ka na didto, Igsoong Neville, kaniadto pa.

When this journey is completed,
 Mahitabo gyud kana, usa sa niining mga adlaw.
 If to God we have been true,
 Makita nato Didto si Igsoong Seward.
 Bright and bright, your home in Glory,
 Your enraptured soul shall view.
 Hold to God's unchanging hand!

Gusto ko ang ingon-niini nga pagsimba, pagkahuman sa mensahe.

Hold to God's unchanging hand!
 Build your hopes on things Eternal,
 Hold to God's unchanging hand!
 Time is filled with swift translation,
 Naught of earth unmoved shall stand,
 Build your hopes on things Eternal,
 Hold . . .

Atong tan-awon Siya, ang Maong dili-makita sa atong taliwala karon, ug simbahon gayud Siya karon samtang nagaawit kita.

Hold to God's unchanging hand!
 Hold to God's unchanging hand!
 Build your hopes on things Eternal,
 Hold to God's unchanging hand!
 Peace! Peace! Wonderful peace,
 Simbahon gyud nato Siya karon.

Coming down . . .

Tapos na ang mensahe. Ang pagsimba na kini.

Sweep over our spirit forever, I pray,
In the fathomless billows of love.

Maghumol lamang kita diha Kaniya.

Peace! Peace! Wonderful peace,
Coming down from . . .

Kanang dakung Tuboran, nagabugwak na Kini.

. . . above;

Sweep over our spirit forever, I pray,
In the fathomless billows of love.

Dili ba kana nakapadasig sa inyo?

. . . Wonderful peace,
Coming down from our Father Above;
Sweep over our spirit forever, I pray,
In the fathomless billows of love.

Dili ba aduna gayu'y butang Niini, nga madagayaon ug malumo?

¹⁸⁸ Naghunahuna ko kung aduna ba kaha dinhi og masakiton nga tawo nga gustong madihogan ug maiampo. Kung aduna man, pabilin lang mo diha sa inyong puwesto. Kana ba nga gining nga anaa dinha sa wheel chair? Dinha lang sa' siya. Ako na ang moduol, para maiampo siya. Dili na niya kinahanglang motindog diha sa wheel chair. Aduna pa ba?

Oh, dili ba gusto pud ninyo kini nga bahin sa panerbisyo? Pila man ang nakabati, og nasayod gayud nga ania karon ang Presensiya sa Dios? Mao kana ang ginahisgotan ko. Ang mao ra . . . Nabati n'yo nga daw sa . . . Pila man dinhi ang nakabati nga daw sa gusto n'yong mosinggit? Karon atong tan-awon. Ang nakabati nga daw sa may kung unsang butang sa inyo nga gusto n'yong mosinggit. Kita n'yo?

It's peace! Peace! Wonderful peace,
Coming down from the Father Above;
Sweep over my spirit forever, I pray,
In the fathomless billows of love.

Shine on me,

¹⁸⁹ Samtang nagasimba kita, ato nang dihogan ang mga may sakit karon, ug iampo sila. Mahimo mo bang moduol sa niini nga direksyon, gining?

¹⁹⁰ Unsa ma'y buut ipasabot niini? "Ang pag-ampo nga inubana'g pagtoo mag-aayo sa masakiton." Karon mag-ampo ang tanan, ilaylay n'yo lang ang maong awit. Handurawa n'yo si Jesus nga nagapang-ayo sa mga may sakit.

Dihogan siya og lana . . .? . . .



MGA HEBREOHANON, KAPITULO UNO CEB57-0821

(Hebrews, Chapter One)

SERYE SA LIBRO SA MGA HEBREOHANON

Kining Mensahe ni Igsoong William Marrion Branham, una giwali sa Ingles niadtong Miyerkules sa gabii, Agosto 21, 1957, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org